


MPWASIKA KATI-KATI
YA BANSUNGI SAMBWADI
YA DIBUUNDU MPE BIDIMBU
SAMBWADI

 Mbote, bankundi ya munu. Ya kele ntangu ya mbote ya nene na kuvutuka awa na yinzo ya Mfumu, na nkokila yayi, na kisalu, mpe beto ke na kusepela samu na mana yina beto me kuzwa na suka yayi, ti mioyo ya beto vwandaka ya kusakumuka mingi na Mvwandulu ya Yandi ya nene. Mpe ntangu yayi, na nkokila yayi, beto ke. . . beto ke banda dilongi yayi: *Mpwasiika Kati-kati Ya Bansungi Sambwadi Ya Dibuundu Mpe Bidimbu Sambwadi*.

² Mpe mu vwanda zonza kaka, na manima ya midi yayi, na nkundi ya munu. Mpe mu banza, kana Mfumu kuzola, na ntangu mosi na été yayi, kana Yandi me baka munu ve na Yinzo, to—to, kana mu ke vutuka, kana mu ke kwenda ve na bayinsi ya nzenza to kima mosi, mu ke zola kutubila diaka Bampungi sambwadi ya nsuka, beno me mona. Mpe yawu nionso ke vukana kintwadi. Mpe—mpe na yina ya ke na Bampasi sambwadi ya nsuka na kati ya yayi. Mpe ya ke vukana kintwadi, mutindu beto ke mona yawu mutindu beto ke kwenda na ntwala.

³ Na yina, na nkokila yayi, na yina beto ke vwanda swi. . . mu lenda vwanda diaka mwa yinda mingi na nkokila yayi. Ata mpe. . . Na ntangu mu ke vutuka awa, ntangu yayi. . . Ata malongi nionso mu me longa na Phoenix, ndinga kangamaka munu ata fioti ve na ntangu mosi, beno me mona. Ya kieleka. Mpe, oh, la la, mutindu mu me longa yawu na ngolo ya munu nionso! Mpe na yina, mu ke kwikila, ya vwandaka na balukutakanu makumi zole na sambwadi, kukondwa kuzwa kukangama ya ndinga. Kasi ya kele climat yina kele awa, beno me mona. Ya kele kaka, ya kele kaka yimbi awa, awa na kiwanda. Ya kele kaka na bakondisyo ya yimbi awa, mpe, samu na mavimpi, beno zaba, yina mu zola tuba, ya kele—ya kele—ya kele yimbi. Mpe mulongi nionso ke na. . . yina ke na kutuba, ke kuzwa mpasi na laka, na kubanda.

⁴ Nkundi ya munu ya dokotolo talaka munu na laka, kilumbu mosi, samu na kutala yina vwandaka tambula mbote ve. Yandi tubaka, “Kima mosi ve.” Yandi tubaka, “Nge ke na ba-callosité

na bansinga ya laka ya nge kuna.” Yandi tubaka, “Yina kele samu na kulonga.” Mbote, mu—mu—mu ke zolaka mutindu yina, beno zaba. Yina ke sala munu mbote mingi, na kuzabaka ti ya lendaka vwanda samu na kulonga, beno me mona. Ya ke vwanda mbote mingi, samu na Kimfumu ya Nzambi.

⁵ Ntangu yayi, beto lenda vwanda ve na zulu ya nzutu ya beto kidimbu ya Ye- . . . ya Yesu Klisto, mutindu Paul, na manima ba me bula yandi. Kasi beto lenda kuzwa kidimbu ya beto na kulonga mpe kuvumbula ndinga ya beto samu na mambu ya yimbi. Na yina, beto ke vutula matondo ti ba fwana bula beto diaka ve, mingi-mingi na ntangu yayi. Na yina beto—beto kele. . .

⁶ Bantu yikwa awa me tanga *Batata, Wapi Ntangu Yawu Me Kuma?* To, me kuwaka yawu, beno zaba, *Batata, Wapi Ntangu Yawu Me Kuma?* Yina me kwamisa munu mingi. Kana beno me salaka yawu ve, mu zola, na mutindu mosi to yankaka, kana beno lendaka kuwa yawu, na mutindu mosi to yankaka. Yina me kwamisa munu. Mu zolaka kaka kukotisa yayi na ntwala ya kubanda lukutakanu. Ya me luta pene—pene ya sabala mosi to bilumbu kumi, mu vwandaka me kwamisama mingi. Mu ke kaka . . . Mu—mu—mu kaka ve, mu vwandaka manga na kulonga mpe nionso yina, samu mu—mu zabaka yawu ve. Yawu monanaka ti ya lendaka vwanda kima mosi ya yimbi, mpe mu zabaka ve yina yawu vwandaka. Na yina mu. . .

⁷ Na suka mosi na suka-suka, mu vumbukaka, samu na kukwenda na Sabino Canyon. Na yina, kubanda na yinzo, ya kele kaka pene ya bitamina makumi tatu ya minuti na ditoma . . . to makumi yiya, samu na kukuma na yintu ya Sabino Canyon, na yina ya kele na nzila ya yinda ya ba-kilometre makumi tanu yina ke mata na mongo.

⁸ Ya kele kizunga ya nzenza, kuna na zulu. Mu lenda vwanda awa na ntoto ya kuyuma, kisika ya kele na degré makumi zole na sambwadi mpe makumi tatu na tatu, na ntangu yayi, mpe na baminuti makumi tatu beno ke vwanda na kati ya neze b metre zole na ndambu, beno me mona, na zulu ya mongo. Beto vwandaka na Phoenix, ntama mingi ve, kisika ya vwandaka ba-degré makumi zole na ndambu, ba-degré makumi zole na nana. Ba kumisaka tiya maza ya piscine, mpe bantu vwandaka yobila. Mpe pene ya baminuti makumi yiya na kunataka ditoma kuna, ya kumaka ba-degré makumi yiya na nsi ya zéro, na Flagstaff. Beno me mona? Yina kele luswaswanu kati-kati ya kubenda ya mupepe mpe ntoto ya kuyuma. Mpe ya kele mbote mingi samu na bambevo ya Asthme, mpe nionso yina.

⁹ Kasi, ntangu yayi, mu kwendaka na canyon, mpe mu mataka na zulu mingi mutindu mu lendaka mata. Mpe mu—mu—mu lombaka Mfumu, na ntangu mu vwandaka kuna na zulu, yina

nionso yayi zolaka tuba, mpe nionso yina. Mu vwandaka fioti ya kukwamisa, mpe mu zabaka ve yinki kusala.

¹⁰ Mpe na yina ntangu mu vwandaka sambila; kima ya ngitukulu salamaka. Mu—mu—mu zola tuba kieleka. Ntangu yayi, ya lendaka vwanda ti mu kubwaka na mpongi. Ya lendaka vwanda mutindu transe, to ya lendaka vwanda vision. Mu ke zola kwikila ti ya vwandaka vision. Ti, mu vwandaka na maboko ya munu na zulu, vwandaka tuba, “Mfumu, yinki zola kutuba kupasuka yayi? Mpe yinki kele Bawanzio sambwadi yayi na kati ya kuvukana ya—ya pyramide, yina zangulaka munu na ntoto mpe balukaka na esete, yinki ya zola tuba?”

¹¹ Mu vwandaka ya kutelama kuna, na kisambu, mpe kima mosi salamaka. Mpe, ntangu yayi, kima mosi kubwaka na diboko ya munu. Mpe mu zaba, kana beno ke bakula ve bima ya kimpeve, ya lendaka monana kieleka ya ngitukulu. Kasi kima mosi kwisaka na diboko ya munu. Mpe, ntangu mu talaka, ya vwandaka mbele. Mpe diboko ya yawu vwandaka ya palata, palata ya kulutula kitoko mu me monaka ntete ve. Mpe mukengi, beno zaba, kisika. . . Mu banza ti ya kele samu na kubumba maboko na kulwala, beno zaba, ntangu beno kele. . . ntangu bantu vwandaka nwana na mwa bimvuka ya fioti; ya vwandaka ya wolo. Mpe lame ya sabre vwandaka ve yinda mingi, kasi ya vwandaka ya meno mutindu lutebo; mpe ya vwandaka ya argent yina vwandaka ngenga. Mpe ya vwandaka kima ya kulutula kitoko yina mu me monaka ntete ve. Ya lungaka mbote mingi na diboko ya munu. Mpe mu simbaka yawu. Mu tubaka, “Yina ke kitoko ve!” Mu talaka yawu. Mpe mu banzaka, “Kasi, nge zaba, mu ke vwandaka na boma ya mbele.” Mu vwandaka na kiesi ti mu zingaka ve na bilumbu yina ba vwandaka sadila yawu, samu mu—mu ke vwandaka na boma ya mbele. Mpe na yina mu—mu banzaka, “Yinki mu ke sala na yawu?”

¹² Mpe na ntangu mu vwandaka me simba yawu, na diboko ya munu, Ndinga mosi katukaka kisika mosi kuna tubaka, “Yina kele mbele ya Ntinu.” Na manima yawu kwendaka.

¹³ Mbote, mu—mu kukiyufulaka yinki ya zolaka kutuba, “Yina kele mbele ya Ntinu.” Mpe mu banzaka, “Kana Yawu lendaka tuba, ‘mbele ya ntinu,’ mu zolaka bakula yawu. Kasi Ya me tuba, ‘mbele ya Ntinu.’” Na yina mu banza ti mu ke bakula yayi mbote ve, kasi mu banzaka, “Ya kele kaka na Mosi, Ntinu, ya kele Nzambi. Mpe Mbele ya Yandi kele *Yayi*, ‘Ya kulutula meno na balweka zole,’ beno me mona. ‘Mpe kana beno ke zinga na kati ya Munu, mpe Bandinga ya Munu. . . .’” Beno me mona? Mpe mu—mu banzaka. . .

¹⁴ Na bitumba mwa kimvuka ya fioti, beno me mona, mpe mutindu mu me baku-. . . Mu ke bakulaka ve mpova mosi na yawu, kasi, to musiku mosi ve samu na bitumba ya mwa bimvuka ya fioti. Kasi, na mutindu mu ke bakula yawu, bambele

vwandaka tutana mosi na yankaka. Mpe na yina, na nsuka, bambele, kana ya me kangama, mbeni mpe beno ke kanga bambele, mutindu *yayi*, na yina ya ke lomba ngolo ya muntu yina ke na kunwana na mwa kimvuka. Samu ti, beno me mona, mbele ya yandi ke vwanda ya kuludika na ntima ya munu, mpe ya munu na ntima ya yandi, kasi yawu kele ya kukangama, mutindu bambele ya beto ke tutana mosi na yankaka. Na manima ba ke bula, na manima bambele ke vukana. Mpe muntu yina ke losa yankaka na ntoto, ke kotisa yandi mbala mosi mbele na ntima. Na yina ya ke lomba . . .

¹⁵ Ata ti mbele kele Ndinga, ya ke lomba diboko ya lukwikilu ya ngolo samu na kusimba Yawu kuna, samu na kunata Yawu na ntima ya mbeni. Ntangu yayi, na kuzabaka ve bima yayi, kasi kaka . . . Nionso yina mu me kuzwa na Yandi, yina mu lenda tuba, mu me tuba na beno. Na yina, ti, beno zaba, mu ke kwikila ti ya vwandaka . . . Ya vwandaka ve Mfumu ya beto tubaka, nyonso yina Yandi kuzwaka na Tata, yina Yandi tubaka, mpe Yandi bumbaka ata kima ve? Mpe—mpe na yina beto zola kusala bima yango kaka mutindu yawu ke kwiza. Ntangu yayi, kana beno ke vwanda na ndwenga ya kieleka, mpe beno ke sambila, mu ke ndima ti beno ke bakula kima mosi ntama mingi ve, ntangu yayi, kima yina mu banza ke monisama.

¹⁶ Ntangu yayi, na Buku yayi, beto nionso kubaka ntangu yayi na kapu ya 5 ya Buku yina ba ke bokila Luzayikisu ya Yesu Klisto.

¹⁷ Ntangu yayi, mbasi na nkokila kele Kidimbu ya Ntete. Na yina, Bidimbu yiya ya ntete me zibuka, na nzila ya minati mpunda yiya, mosi na konso Kidimbu yina ke bula na ntoto. Mpe na yina, ntangu yankaka, ya ke vwanda yinda mingi ve, tii na manima beto ke luta . . . Kilumbu ya ntete, Kilumbu ya zole, Kilumbu ya tatu, tii na Kilumbu ya yiya. Na yina, mu banza, ya Sambanu . . . mpe ya Tanu, ya Sambanu, mpe ya Sambwadi, mu banza ti ya ke vwanda yinda mingi. Na yawu, mu banza ti ya ke pesa beno mwa ntangu ya kupema fioti.

¹⁸ Beto zola kubanda balukutakanu awa, mu ke kwikila, na ngunga ya sambwadi, na bankokila ya sabala. Mpe mu ke vwanda na estrade na ngunga ya sambwadi na ndambu, ya kieleka. Mpe na manima ya ke bika beto kubasika na kati-kati ya mpimpa. Na yina—na yina, mu—mu me lutisa ntangu ya munu na ngunga mosi, na suka yayi. Mu zolaka sala yawu ve, mu ke kaka . . . Mu zaba ve wapi ntangu.

¹⁹ Samu, mu zaba ve yina munati mpunda ya ntete kele. Mu zaba ve ya Zole, ya Tatu, ya Yiya, ya Tanu, ya Sambanu, to ya Sambwadi. Mu, tii na ntangu yayi, mu zaba ve. Beno me mona? Mu ke na kutalaka kaka na Yandi. Na yina ya kele samu na yina, mu ke meka sabala yayi, na lemvo ya Nzambi na kusadisa

munu, na kukwikilaka yawu, kana beno ke bakula na mudindu mingi . . .

²⁰ Beno zaba, na ba-vision, beno lenda ve kumonisa bima tii ntangu beno ke kuzwa muswa ya kumonisa yawu. Bambala yikwa beno me kuwaka munu kutuba, “Ntangu beno ke kota na yinzo, mu banza ti yimpu ke vwanda *awa*. Mpe mwana yayi, to nionso yina, ke beluka ve tii kuna ya ke vwanda *awa*.” Mu lenda ve kutuba yawu, to mu lenda ve kutula yawu kuna. Yawu fwana vwanda, kuna, na mutindu yankaka. Muntu yankaka fwana baka yawu mpe kukatula yawu. Mpe, bima nionso na ndonga, na yina ya lenda monisama.

²¹ Na yina ntangu yayi beno vwanda na bisambu. Ntangu yayi, kaka na ntwala beto belama na Buku, beto tuba na Yandi, na bayintu ya beto ya kukulumusa.

²² Mfumu Yesu, beto nionso kele ya kulunga ve. Beto lenda meka ve, ata fioti ve, na kubelama na Buku yayi ya santu, na ngunga yayi ya kulutila santu yina myoyo kele ya kunamika na kati ya ntangu ke vingila lukanu ya bawu, kukondwa kulomba, Mfumu, ti, Mosi kaka lenda monisa pwelele Buku yayi, ti Yandi ke kwisa ntangu yayi, ke sakumuna mwa bangolo ya kulemba ya kisadi ya Nge. Nkembo na Ndinga mutindu Yawu ke longama. Bika ti Yawu kwenda na ngolo ya Mpeve. Mpe bika ti ntoto ya kimpeve ya . . . bayina kele na nzala mpe mpwila ya kuzaba kieleka mpe kuzaba luzolo ya Nzambi, bika ti Yawu kubwa na kati kuna mpe kubasisa mutindu ya Yawu. Pesa yawu, Mfumu. Lukumu nionso ke vwanda ya Nge. Bika ti bayina kele na nzala mpe na mpwila kuzwa madia mpe masa ya kunwa, na nkokila yayi, na Ndinga. Beto ke lomba yawu na Nkumbu ya Yesu, Yandi yina kele yinto ya luzayikisu. Amen.

²³ Ntangu yayi, ntangu yayi beto ke baka kapu ya 5. Ntangu yayi, yayi kele ve Bidimbu Sambwadi. Ya kele mpwasika na kati-kati ya bansungi ya dibuundu mpe Bidimbu Sambwadi. Ntangu yayi, ya kele dyaka na kapu ya 6 ya . . .

²⁴ Mpe ya vwandaka na kapu ya 4, mu zola tuba, ya Apocalypse, mpe, na yina, ya me monana ti kima yina ke salama na manima Dibuundu ke mata. Ti, Dibuundu ke mata na kapu ya 3 ya Apocalypse, mpe ke vutuka ve tii na kapu ya 19 ya Apocalypse. Beno me mona? Na yina, Dibuundu ke luta ve na Lukwamusu. Mu zaba ti ya kele ya kuswaswana na—na kutala na malongi ya mulongisi nyonso yina mu me zonzaka. Kasi mu—mu—mu—mu zola ve kuvwanda muntu yina ke niongisa. Mu—mu zola kuvwanda mpangi ya beno, kasi mu—mu fwana longa kaka mutindu mu lenda mona Yawu. Kana ve, mu lenda ve kutula Yawu kintwadi, beno me mona. Mpe ntangu yayi, kana Yawu kwenda na ntwala ya Lukwamusu to na manima ya Lukwamusu, mu zola mata na Yawu. Yina kele kima ya mfunu.

25 Na yina, bima yina beto—beto ke na kubanzaka, samu, mu me longukaka ve, mu ke sadilaka bifwanisu. Mu ke tala mpe ke mona yina kele, to yina vwandaka na Ngwisani ya Ntama, yina kele kifwanusu to kivudi ya Malu-malu, na yina mu ke na dibanza mosi yina kele ya Malu-malu. Beno me mona? Mutindu kana . . . Noé kotaka na nzaza ntete lukwamusu, kifwanisu; kasi ata mpe na ntuala Noé, beno me mona, kukota na nzaza, Enoch zangukaka, beno me mona, ntete kima mosi kusalama. Mpe ba bokilaka Lot na ngaanda ya Sodome na ntuala mwa kitini ya lukwamusu kuvwanda, ya kubeba; kasi Abraham vwandaka, ntangu nyonso, na ngaanda ya yawu. Beno me mona, bifwanisu.

26 Kasi ntangu yayi beto ke tanga nzila ya 1. Mu ke tanga banzila zole to tatu ya ntete ya Yawu.

Mpe mu monaka na diboko ya kibakala ya yandi yina vwandaka na zulu ya kiti ya kimfumu buku yina ba me sonika na kati mpe na ngaanda, yina ba me kanga na bidimbu sambwadi.

Mpe mu monaka wanzio ya ngolo kutuba bandinga na ndinga ya ngolo, Nani kele ya kulunga na kuzibula buku, mpe kuzibula bidimbu ya yawu?

Mpe ata muntu ve na mazulu, to na ntoto, to dyaka na yisi—to dyaka na yisi ya ntoto, vwandaka na lenda ya kuzibula buku, to kutala Yawu ve. (Wapi mutindu ya Buku!)

Mpe mu dilaka mingi, samu ata muntu ve vwandaka ya kulunga samu na kuzibula mpe kutanga buku, to kutala yawu.

27 Ntangu yayi, beno ke zonzila na kukondwa kulunga? “Mpe kele ve ya kulunga na kutala Yawu; muntu mosi ve, kisika mosi ve.”

Mpe mosi ya bakuluntu tubaka na munu, Kudila ve: tala, Nkosi ya dikanda ya Juda, Nkuna ya David, me nunga samu na kuzibula buku, mpe samu na kuzibula bidimbu sambwadi ya yawu.

Mpe mu talaka, mpe, tala, na kati-kati ya kiti ya kimfumu mpe ya bibulu yiya, . . . na kati-kati ya bakuluntu, vwandaka Mwana-dimeme mutindu ya kufwa, yandi vwandaka na bibongo sambwadi mpe meso sambwadi, yina kele Bampeve sambwadi ya Nzambi yina ba fidisaka na ntoto ya muvimba.

Mpe yandi kwisaka mpe bakaka buku na diboko ya yandi ya kibakala yina vwandaka na kiti ya kimfumu.

28 Beto ke zenga na mwa ntangu fioti ntangulu ya beto, kubanda na Apocalypse 5, na nzila ya 7 dyaka.

29 Buku yayi ya Bidimbu Sambwadi me monisama pwelele na ntangu ya Banzasi Sambwadi ya Apocalypse Apocalypse 10,

ntangu yayi, kana beno ke na kusunikaka yawu. Beto baka Apocalypse 10, kaka na mwa ntangu fyoti, samu ti beno kubaka lubakusu ntete beto kota na yawu. Ntangu yayi, yayi kele na ntangu ya nsuka. Samu ti, beno kuwa:

. . . Mu monaka wanzio yankaka ya ngolo kukulumuka na zulu, yandi me lwata dituti: mpe mukyama . . . na zulu ya yintu ya yandi, . . .

³⁰ Kana beno tala mbote, ya kele Klisto, beno me mona. Samu ti, Yandi, na Ngwisani ya Ntama, ba bokilaka Yandi Wanzio ya Ngwisani. Mpe Yandi ke kwisa mbala mosi na ba-Juif ntangu yayi, samu ti Dibuundu me suka. Beno me mona? Mbote mingi.

. . . mpe kizizi ya yandi . . . mutindu mwini vwandaka, mpe makulu ya yandi mutindu makunzi ya tiya:

³¹ Beno ke bambuka moyo na Wanzio yina na Apocalypse ya 1? Kima mosi. *Wanzio* kele “munati-nsangu.” Mpe Yandi kele Munati-nsangu samu na Israel. Beno me mona? Dibuundu me zanguka, beno me mona, ntangu yayi, to ke zola kukwenda na enlevement. Yandi ke kwisa samu na Dibuundu ya Yandi. Ntangu yayi beno tala mbote.

Mpe yandi vwandaka na diboko ya yandi mwa buku ya kuzibuka: . . .

³² Ntangu yayi, *awa*, Yawu vwandaka ya kukangama awa mpe ya kukanga; mpe *awa* Yawu kele ya kuzibuka. Yawu me zibuka. Kubanda ntangu yina ya vwandaka ya kukanga, beto ke kota na yawu na nkokila yayi, ntangu yayi Buku me zibuka. “Mwa Buku na diboko ya Yandi, na Yandi . . . Ya vwandaka ya kuzibuka. Oh, wapi mutindu mwini, mutindu makunzi . . .” Beno vingila fioti. Beno bika mu banda na manima awa mpe mu ke tanga.

Mpe yandi vwandaka na diboko ya yandi mwa buku ya fioti ya kuzibuka: mpe yandi tulaka dikulu ya yandi ya kibakala na zulu ya mubu, mpe dikulu ya yandi ya kikento na zulu ya ntoto,

Mpe yandi bokaka na ndinga ya ngolo, mutindu nkosi ke bokaka: . . .

³³ Beto zaba ti Yandi kele Nkosi ya dikanda ya Juda. *Kuna* Yandi kele Mwana-dimeme; kasi *awa* Yandi kele Nkosi. Beno me mona?

. . . mpe ntangu yandi bokaka, banzasi sambwadi tubaka.

³⁴ Ntangu yayi, ba tumaka Jean na kusonika yina yandi monaka, na yina ntumwa, mpe profete, bakaka kilapi ya yandi samu na kusonika Yawu.

Mpe ntangu banzasi sambwadi tubaka, mu zolaka sonika: mpe mu waka ndinga mosi na zulu kutuba na

munu, Kanga bima yina banzasi sambwadi me tuba, mpe kusonika yawu ve.

35 Ntangu yayi, yawu yina beto zaba ve. Yina ke monisama pwelele. Yawu ke na Masonuku ya Santu ve, yina Banzasi tubaka.

Mpe wanzio yina mu monaka ya kutelama na zulu ya mubu mpe na zulu ya ntoto zangulaka maboko ya yandi na zulu, (ntangu yayi beno kuwa)

Mpe zengaka ndefi na nzila ya yandi yina ke zinga mvula na mvula mpe mvula na mvula, yina vangaka mazulu, mpe bima yina kele na kati, mpe ntoto, mpe bima yina . . . kele, mpe . . . ti ntangu ke vwanda dyaka ve:

36 Beno tala mbote! Awa kele nzila yina mu zola kukuma.

Kasi na bilumbu ya ndinga ya wanzio ya sambwadi, ntangu yandi ke banda na kubula mpungi, mansweki ya Nzambi fwana salama, mutindu yandi me tuba na bisadi ya yandi baprofete.

37 Ntangu yayi, beno me mona, mansweki ya Buku yayi ya Sambwadi Bidimbu Sambwadi ke monisama pwelele na muningu ya Nsangu ya wanzio ya sambwadi. Beno me mona? “Wanzio ya sambwadi ke banda na kuzonza,” mpe ya kele na Bansangu yina ba sonikaka kuna, mpe beto kele na Yawu na bande mpe na buku. Ntangu yayi, “Na mbandukulu ya muningu ya Nsangu, mansweki ya Nzambi ke suka, beno me mona, na ntangu yina.” Ntangu yayi beto ke tala. Buku, mansweki ya Nzambi, me monisama ve tii kuna Nsangu ya wanzio ya sambwadi me wakana.

38 Ntangu yayi, bima yayi ke vwanda ya kulutila mfunu na kati ya Bidimbu, ya kieleka, samu Yawu fwana vwanda mutindu yina, konso kitini, ya kukangama kintwadi.

39 Ntangu yayi, Yawu me sonamaka na mansweki, samu muntu mosi ve, kisika mosi ve, zaba Yawu. Nzambi kaka, Yesu Klisto, beno me mona. Ntangu yayi, kasi ya kele . . . Ya kele Buku, Buku ya mansweki. Ya kele Buku ya Mpulusu. Beto ke kota na yawu, na mwa ntangu fyoti. Mpe ntangu yayi beto zaba ti ba ke bakula ve Buku yayi ya Mpulusu; Ya kele kieleka, na kati ya bansungi sambanu ya dibuundu. Kasi na nsuka, ntangu wanzio ya sambwadi ke banda na kusamuna mansweki ya yandi, yandi ke zonzila bima yayi nionso yina bantu yayi bikaka na lweka. Mpe mansweki ke kulumuka na Nzambi, mutindu Ndinga ya Nzambi, mpe ke monikisa luzayikisu ya muvimba ya Nzambi, na yina Buzambi mpe nionso yankaka me suka. Mansweki nionso, nkuna ya nioka, mpe nionso yankaka, fwana monisama.

40 Ntangu yayi, beno me mona, mu ke na kutubaka yawu ve munu mosi. Ya kele yina . . . Ya kele MUTINDU ME TUBA

MFUMU. Mu ke tanga Yawu samu na beno na ngaanda ya Buku, “Muningu ya Nsangu ya wanzio ya sambwadi, mansweki ya Nzambi fwana ke suka, ya kele yina ba tubaka na nzila ya baprofete ya Yandi ya santu,” ya kele baprofete yina sonikaka Ndinga. Na muningu, ya nsungi ya sambwadi ya dibuundu, nsungi ya nsuka ya dibuundu, bima nionso yina vwandaka na lweka, yina ba zonzilaka na kati ya bansungi yayi ya dibuundu, ba ke zonzila yawu kintwadi.

⁴¹ Mpe ntangu Bidimbu ke zibuka, mpe mansweki me monisama, Wanzio ke kulumuka, Munati-nsangu, Klisto, ke tula dikulu ya Yandi na zulu ya ntoto mpe na zulu ya mubu, na mukyama na zulu ya yintu ya Yandi. Ntangu yayi, beno bambuka moyo, wanzio ya sambwadi yayi kele na zulu ya ntoto na ntangu ya Nkwizulu yayi.

⁴² Kaka mutindu Jean vwandaka pesa nsangu ya yandi, kaka na ntangu mosi Mesiya kwisaka na bilumbu yina. Jean zabaka ti yandi ke mona Yandi, samu ti yandi ke lakisa Yandi.

⁴³ Mpe beto ke bakula ti, na Masonuku, kuna na Malachie 4, ya kele na mosi mutindu Jean, Élie na bayina mosi yina Ndinga ya Nzambi ke kwiza. Mpe yandi ke monisa pwelele, na nzila ya Mpeve-Santu, mansweki nionso ya Nzambi, mpe kuvutula Lukwikilu ya bana na lukwikilu ya batata bantumwa, ke vutula mansweki yayi nionso ba zonzilaka, na kati ya bamvula yayi ya ba-denomination. Ntangu yayi, yawu yina Ndinga me tuba. Mu ke na kiyeka ya yina Yawu me tuba. Beno me mona? Ya kele—Ya kele ya kusonika, ya kele kieleka. Ya kele yina Yawu kele.

⁴⁴ Ntangu yayi, beto ke mona ti Buku yayi ya Bidimbu Sambwadi, ntangu yayi, kele mansweki ya mpulusu. Ya kele Buku ya Mpulusu, yina me katuka na Nzambi.

⁴⁵ Ntangu yayi, mansweki nionso, na ntangu yayi, ke suka na muningu ya munati-nsangu yayi. Ntangu yayi, *awa* kele wanzio mosi na zulu ya ntoto; mpe Wanzio “yankaka,” Munati-nsangu ya ngolo, me kulumuka. Beno me mona, wanzio *yayi* vwandaka wanzio ya ntoto, munati-nsangu; kasi *awa* me kulumuka Mosi kuna na Zulu, ngwisani ya mukyama, beno me mona, kaka Klisto yina ya lendaka vwanda.

⁴⁶ Kieleka kaka mutindu ya vwandaka na Apocalypse, kapu ya 1, “Ya kutelama na kati-kati ya Minda Sambwadi ya Wolo, na mukyama, ke monana mutindu ditadi ya jaspe mpe sardoine.”

⁴⁷ Mpe awa Yandi ke vutuka, na kapu ya 10, na manima ya ntangu yina ke kwisa ti mansweki nionso ke suka mpe Bidimbu ke bukana, mpe ke samuna ti ya kele, “Ntangu kele dyaka ve.” Mpe Yandi tubaka, “Ntangu wanzio ya sambwadi me banda na kubula mpungi, na yina mansweki ke suka, mpe ya kele ntangu ya Wanzio ke monana.” Beto me kuma pene-pene, kisika mosi kuna. Kieleka. Ntangu yayi beno tala.

48 Bidimbu Sambwadi ke kanga mansweki ya Buku. Tii kuna beto lenda mona yina Bidimbu Sambwadi me bumba kuna na kati, beto ke na kubanzaka kaka bima yayi. Samu, mutindu mu me tuba na beno, na suka yayi, na zulu ya mwa Nsangu ya munu na suka yayi, ya Nzambi yina me bumbama na kati ya kukikulumusa. Beno me mona, beto—beto kele. . . Beto lenda ndima ya kieleka ti beto ke luta na lweka kaka kana Yawu me monisama ya kieleka, pwelele na nzila ya Mpeve-Santu, mpe me siamisama mutindu mosi. Beno me mona? Kana profete ke telama mpe ke tuba na beno ti Yayi kele kaka Yawu, mpe Nzambi ke kusiamisa ve mutindu mosi, beno zimbana yawu. Beno me mona? Kasi Nzambi, fwana siamisa bandinga nionso, bima nionso, fwana kusiamisa Yawu, samu Yawu vwanda ya kieleka. Beno me mona? Na yina, bana ya Yandi ke tala bima yina, beno me mona, mpe beno vwanda na bukebi, beno tala.

49 Bidimbu Sambwadi na zulu ya Buku, kele na. . . Bidimbu Sambwadi yayi kele na Buku yina ba me kanga. Beno me mona? Buku kele kieleka ya kukanga. Beno me mona yawu? Buku kele kieleka Buku yina ba me kanga tii Bidimbu Sambwadi ke bukana. Ya kele ya kukanga na Bidimbu Sambwadi. Ntangu yayi, ya kele ya kuswaswana na Banzasi Sambwadi. Beno me mona? Yayi kele Bidimbu Sambwadi na zulu ya Buku. Mpe Buku ke vwanda ve, Bidimbu ke zibuka ve tii na Nsangu ya wanzio ya sambwadi. Beno me mona? Na yina beto—beto ke na kubanzaka; kasi luzayikisu ya kieleka ya Nzambi ke vwanda ya kulunga ntangu ba ke samuna yawu, Kieleka yina ba me siamisama. Ntangu yayi, ya kieleka yawu yina Ndinga me tuba, “Mansweki fwana suka na ntangu yina.”

50 Mpe Buku yayi ya Bidimbu Sambwadi, beno bambuka moyo, Yawu vwandaka ya kukanga awa, na Apocalypse kapu 5, mpe na Apocalypse kapu 10 Yawu me zibuka.

51 Mpe ntangu yayi beto ke mona yina Buku ke tuba samu na mutindu Yawu me zibuka. Mpe ya me zabana ve tii kuna Mwana-dimeme me baka Buku, mpe ke buka Bidimbu, mpe ke zibula Buku. Beno me mona? Mwana-dimeme fwana baka Buku.

52 Ya kele ya kubumbama. Ntangu yayi beno bambuka moyo, “Muntu mosi ve na Mazulu, muntu mosi ve na ntoto,” pape, évêque, cardinal, surveillant général, to konso muntu yina yandi kele, “lenda buka Bidimbu yayi, to kumonisa Buku, kaka Mwana-dimeme.” Mpe beto me tala, mpe beto me banza, mpe beto me titiba, mpe beto me kukiufula, mpe—mpe ya kele samu na yina beto nionso kele na muvusu ya mutindu yayi.

53 Kasi na nsilulu ya Kinzambi ti Buku yayi ya Mpulusu ke zibuka na mutindu ya kulunga na nzila ya Mwana-dimeme, mpe Kidimbu na ntangu yina ke zibuka na Mwana-dimeme, na bilumbu ya nsuka yina beto ke na kuzinga ntangu yayi. Mpe ya me zabana ve tii kuna Mwana-dimeme ke baka Buku mpe ke

buka Bidimbu. Samu ti, beno bambuka moyo, Buku vwandaka me simbama na maboko ya Yandi yina vwandaka ya kuvwanda na zulu ya Kiti ya kimfumu. “Mpe Mwana-dimeme ke kwiza na Yandi yina kele ya kuvwanda na zulu ya Kiti ya kimfumu, mpe ke baka Buku na diboko ya Yandi ya kibakala.” Yandi ke baka Buku! Oh, ya kele mudindu. Beto ke meka na kutendula yawu kana beto lenda, na nzila ya lusalusu ya Mpeve-Santu. Ntangu yayi beto ke na kutala na Yandi. Mpe beto ke mona, na manima, ya kele na ntangu ya nsuka, “Ntangu ntangu me luta.”

⁵⁴ Denomination mosi ve kele na muswa ya kutendula Buku. Muntu mosi ve kele na muswa ya kutendula Yawu. Ya kele Mwana-dimeme Yina ke tendula Yawu. Mpe Mwana-dimeme kele Yandi yina ke zonzila Yawu, mpe Mwana-dimeme ke sala ti Ndinga kuzabana, na kupesaka kimbangi mpe kunata Ndinga na Luzingu. Beno me mona? Kieleka! Beno tala. Mpe kele ve ya kumonana tii . . .

⁵⁵ Buku yayi me monisama ntete ve tii na bansungi ya dibuundu na bansungi ya denomination, “mpe kele diaka na ntangu ve.” Beno me mona yawu? Ya ke monisama kaka na manima ya bansungi ya dibuundu mpe bansungi ya denomination me suka.

⁵⁶ Kikuma yawu yina ya kele na poto-poto yayi na nkokila yayi. Beno me mona, bawu ke sengumuna mwa dilongi mosi, mpe bawu ke kwenda mbangu na lweka yayi *awa*, ke tuba, “Yayi kele Yawu!” Muntu yankaka ke sengumuna dilongi yankaka, ke kwenda mbangu na lweka *yayi*, ke tuba, “Yayi kele Yawu!” Mpe konso muntu ke tunga denomination mosi na nsi ya yawu, tii kuna beto ke kuzwa bankama ya ba denomination. Kasi na nionso, na kati ya nionso ya yawu, samu na kumona muvusu, bantu ke kukiyufula, “Yinki kele Kieleka?” Tala kieleka kisika beto kele bubu yayi!

⁵⁷ Kasi na yina Yandi silaka, ti, “Ntangu ntangu yina ke suka, ya ke vwanda na muingu ya ndinga ya wanzio ya sambwadi, mpe kuna Buku ke monisama, beno me mona, na ntangu yina.”

⁵⁸ Ntangu yayi, beno tuba ve, muntu mosi ve kutuba, “Bantu yina kuna me kuzwaka mpulusu ve.”

⁵⁹ Kasi, mansweki, yina ba lendaka bakula ve! Wapi mutindu Nzambi lendaka vwanda tatu mpe, dyaka, Mosi! Wapi mutindu Masonuku lenda tuba, “Beno botika na Nkumbu ya Tata, Mwana, Mpeve-Santu,” mpe kubaluka mpe kutuba, “Beno botika na Nkumbu ya Yesu.” Beno me mona? Oh, bima mingi! Wapi mutindu Eve lenda kudya pomme mpe ya ke sala mpasi na yinza ya muvimba? Beno me mona? Wapi mutindu bima yayi lenda vwanda? Kasi ba silaka ti mansweki yina ke monisama na ntangu ya nsuka.

⁶⁰ Ya kele mwa bima ya fioti, yina bikanaka na lweka . . . Binwani mvita yayi ya nene me kota na kosalu, mutindu Irénée,

mpe Martin, Santu Martin, mpe Polycarpe, mpe bayankaka, Luther, mpe Wesley, mpe bayayi nyonso. Beno me mona? Wapi mutindu bawu kwisaka mpe zingaka mingi samu—samu na kunata nsemo mpe kusemisa yawu, kasi bawu bikaka bima mingi na—na kati ya mudidi. Na manima me kwiza Nsungi ya Pentecote, mutindu Nsungi ya Luther, bawu mpe me basika na nzila. Kasi kuna diaka, mbote mingi, beno tuba ve ti bawu vwandaka ve na kieleka. Bawu vwandaka. Kasi ya kele na bima yina ke bikana na lweka, yina ba lendaka ve kutendula. Kasi ya kele na . . . Samu na yinki? Bidimbu me bukana ve, samu na kumonisa pwelele bima yayi. Beno me mona?

⁶¹ Kasi na yina, na nsungi ya nsuka, ba fwana tendula mpe kusamuna mansweki nionso yayi. Mpe Bidimbu fwana zibuka na nzila ya Mwana-dimeme, mpe ke monisama pwelele na Dibundu, mpe na yina ntangu ke vwanza diaka ve. Beno me mona? Yawu ke kitoko mingi! Na yina, Buku, na yina, kele Buku ya Mpulusu. Na yina, na manima Yawu ke landila . . .

⁶² Mpe beto ke zonzila, na ntwala, mutindu nkama na makumi yiya na yiya ya mafunda ke kota, mpe nionso yina. Mbote mingi. Ya kele ba-Juif.

⁶³ Ntangu yayi, ntangu yayi, Paul. Beto tanga mwa fyoti. Mu ke baka ndambu ya Masonuku yayi, mpe mu banza ti beto fwana ku—kutanga Yawu. Ntangu yayi beto nyonso kubaka; Paul, na Éphésiens 1.

⁶⁴ Mu ke na kumona bantu mingi ke na kusonika. Bawu kele na babuku ya bawu mpe ke sonika Masonuku, ke tula kidimbu na kati ya Biblia ya bawu, samu na ndandani. Na yina, ya kele—ya kele mbote. Mu ke zolaka beno kusala yawu, mpe na manima beno ke kwenda na yinzo mpe beno ke longuka Yawu. Beno me mona? Mpe—mpe kana beno longuka Yawu, beno mosi, na beno ke—beno ke bakula Yawu mbote mingi. Beno me mona? Beno longuka Yawu kaka, mpe beno lomba na Nzambi na kusadisa beno na kubakula.

⁶⁵ Ntangu yayi beto tanga Masonuku yina mu me sonika awa. Éphésiens 1:13 mpe 14, ntangu yayi.

Kati na yandi diaka beto, na manima ya kuwa ndinga ya kieleka, na manima beno me kuwa ndinga ya kieleka, mpe nsangu ya mbote ya mpulusu ya beno: na kati ya yandi. . . beno me kwikila, beno me kuzwa kidimbu ya Mpeve-santu yina ba silaka,

Yina kele ndandu ya difwa ya beto samu na mpulusu ya bayina ba me vulusa, samu na lukumu ya nkembo ya yandi. Beno me mona?

⁶⁶ Ntangu yayi, na yina beto kele na Masonuku ya kuzibula, bika ti beto. . . Beno me mona, Mpeve-Santu awa, Yawu mosi, kele Kidimbu. Mpeve-Santu kele Kidimbu. Mpe Kidimbu ke talisa (yinki?) kusalu yina ba me manisa, Mpeve-Santu kele

Kidimbu samu na muntu. Mpe samu na muntu yina, ntangu yandi ke zwaka Mpeve-Santu, na yina ntangu ya yandi ya kuboka me suka, beno me mona, samu ya kele kisalu me mana.

⁶⁷ Mutindu, ntangu mu vwandaka sala na kompani ya chemin de fer, mpe beto vwandaka fulusa ba-wagon na bima ya manzanza mpe bima ya mutindu na mutindu yina vwandaka katuka na kompani ya manzanza. Mpe, kasi, na yina, na ntwala ba ke kanga ditoma yina, nzikisi ke kwisa kuna, samu na kutala kana ba me fulusa bima mbote-mbote na ditoma. Kana ve, [Mpangi Branham me bula maboko ya yandi—Mu.] na kuningana ya ntete, bima nionso ke panzana mpe ke beba, mpe—mpe ya ke vwanda kizitu ya kompani ya chemin de fer. Mpe nzikisi yina ke tala bima nionso, samu na kumona kana bima nionso vwandaka na kisika ya yawu. Kana ya vwandaka ve, yandi vwandaka kanga wagon. Na yina beto fwana kubanda nionso, tii kuna nzikisi ke sepela. Mpe na yina ntangu nzikisi ke sepela, yandi ke kanga kielo. Nzikisi ke kanga kielo. Mpe nzikisi ke tula kidimbu na zulu ya yawu, mpe na yina muntu mosi ve lenda kubuka kidimbu yayi tii kuna ya ke kuma kisika ya yawu ya nsuka.

⁶⁸ Ya kele yina Mpeve-Santu vwandaka sala. Beno me mona? Yandi ke kwenda mpe Yandi ke tala. Ya kele samu na yina beno lenda ve kuzwa bima yayi mpe. . . Beno ke tuba, “Mu zonzaka na bandinga, mpe mu bokaka, mpe mu binaka na Mpeve.” Yina ke na kima ve ya kusala na Yawu. Beno me mona? Mpeve-Santu ke tala muntu yina tii kuna Yandi ke sepela ya kieleka mpe zaba yina bawu kele.

⁶⁹ Na yina, ba kele ya kutula kidimbu na kisika ya bawu ya Kukonda nsuka. Ya kele ve na kima yina lenda buka Kidimbu yina. Biblia. . . Beno ke na kusonika Masonuku ya beno. Éphésiens 4:30, yandi tubaka, “Benoni ngisa Mpeve-Santu ya Nzambi ve, yina pesamaka na beno mutindu kidimbu tii na Kilumbu ya Mpulusu ya beno.” Benoni simba mpova yayi, “mpulusu,” beno me mona. Tii kilumbu yina Buku ya Mpulusu me monisama pwelele, mpe Mukudi ke kwisa samu na kulomba ya Yandi! Kima mosi ve lenda sala yawu. Beno me mona? “Benoni ngisa Yawu ve.” Benoni vwanda. . . Benoni sala bima yina ke sepelisaka Nzambi, samu Buku kele ya kukanga, ntangu yayi, mpe beno kele ya kutula kidimbu. Mpeve-Santu, Yawu mosi, kele Kidimbu.

⁷⁰ *Kidimbu* zola kutuba. . . Ntangu yayi, yayi kele bampova yina mu me kuzwa na dictionnaire. *Kidimbu* ke talisa “kisalu me mana.” Mpe ntangu Kidimbu ya Sambwadi me bukana, mansweki ya Nzambi yina ba me kanga na kati ya Bidimbu yayi ya mansweki me mana. Tii na kilumbu yina Kidimbu yina ke bukana, mpe yawu ke monisa pwelele yina kele na kati ya Yawu.

⁷¹ Kana muntu ke kukiyufula yinki kele na kati ya wagon yina, yandi ke tuba, “Ya fwana vwanda na kima *yayi-mpe-yayi*. Ya

fwana vwanda.” Yandi ke na kubanzaka. Kasi ntangu kidimbu me bukana, mpe kielo me zibuka, beto ke mona na kati ya yawu na ntangu yina mpe beto ke mona kieleka yina kele na kati kuna.

Beno me mona yawu? Mpe yina ke salama kaka na ntangu ya nsuka.

⁷² Kima yankaka yina Kidimbu ke talisa, kele “kima ya muntu.” Beno me mona, Kidimbu kele na mwa kidimbu ya fioti na zulu ya Yawu, yina ke talisa ti ya kele kima ya muntu. Ntangu beno me sumbama na Menga ya Yesu Klisto, mpe ba me tula kidimbu na Mpeve-Santu, beno kele diaka ve ya yinza to kima mosi yina ke fwanana na yinza. Beno me kuma ya Nzambi.

⁷³ Kima yankaka, kele, Kidimbu kele “lukengolo.” Kidimbu zola kutuba ti beno kele na lukengolo. Ntangu yayi, beno bayina ke kwikilaka ve na lukengolo ya Kukonda nsuka, mu zaba ve, beno me mona. Kasi ntangu yayi, kasi, Kidimbu ke talisa lukengolo tii na kisika ya yawu ya nsuka. Kyadi na muntu yina ke meka na kubuka Kidimbu yina! Mpe Kidimbu ya Mpeve-Santu lenda ve kubukana.

⁷⁴ Beno nionso me kuwaka munu kutuba ti bantu ke tubaka, “Diabulu me sala ti mu sala *yayi*.” Ve, ve, diabulu me sala yawu ve. Ba me tula beno kidimbu ve na kati. Samu, ntangu ba me kanga beno na kati, yandi kele ya kukanga na nganda. Yinga. Beno me mona? Ntangu yayi, beno kwendaka na kisika ya yandi. Uh-huh. Yandi lendaka ve kukota na kati ya beno, samu nzila mosi kaka samu na kukota na kati ya beno kele kuluta na nzila yina beno lutaka. Yandi zolaka kuzwa mpulusu, kusantisama, mpe kifuluka na Mpeve-Santu, na yina yandi ke vwanda mpangi ya beno. Na yina, beno me mona, na yina yandi—yandi salaka yawu ve. Ve, ve. Beno me kwenda kaka na ndilu mpe beno me vutuka, beno ke na kulula bima ya yinza. Beno me kwendaka ata fioti ve tii na Canaan, beno me mona, na simu ya Jourdain, lufwa ya beno mosi. Beno me mona?

⁷⁵ Ntangu yayi beno tala, ntangu yayi, Buku yayi kele ya kukanga. Mpe—mpe beno kele ya kutula kidimbu, na Buku, tii na Kilumbu ya Mpulusu.

⁷⁶ Diaka, na Romain 8:22 mpe 23. Beto baka yawu, mpe beto ke kuzwa dibanza, na yina mu banza ti beto ke bakula Yawu mwa mbote mingi kana muntu nyonso ke na kutangaka Yawu samu na yandi mosi. Mu ke na kupesa beno mwa Masonuku awa, samu ti beto—beto lenda tala Yawu, mpe na yina ngunga kele dyaka ya malu-malu. Ntangu yayi, 8, Romain 8:22, na kubanda.

Samu ti beto zaba ti luvangulu nyonso kele na kunionga mpe kele na mpasi ya kubuta na ntangu yayi.

Mpe kaka bawu ve, kasi beto mosi mpe, yina kele na bambuma ya ntete ya Mpeve, ata mpe beto ke boka na kati ya beto, ke vingila lukumu ya bana, samu na ngolo, mpulusu ya nzutu ya beto.

77 Oh, la la! Oh, la la! Yina ke sala beto mbote ve? Ya zolaka sala beto nionso kuwa mbote, na kuingilaka ngunga yayi. Beto me bakula ti yayi ke salama na mvumbukulu ya ntete. Beno me mona? Yinza ke na kunionga. Beto ke na kunionga. Bima nionso ke na kunionga, samu beto me bakula ti kima mosi ke tambula mbote ve. Mpe mutindu kaka beno lenda nionga, mpe kuingila yawu, samu ti ya vwandaka na Luzingu ya malu-malu yina me kwisa na kati *awa*, yina ke zonzila Yinza ya malu-malu.

78 Mutindu kento ya munu awa, ntama mingi ve, beto kwendaka awa na supermarché. Mpe mu tubaka, “Beto me mona kima ya ngitukulu; mama mosi me lwata robe.” Mpe yawu vwandaka ya ngitukulu mingi, beno me mona. Bawu, bawu kele . . . Na kutala bawu nyonso ke lwataka ve ba-robe, beno me mona. Mpe, na mutindu nyonso, ba ke na nzimbani; ba ke basika kukondwa yawu. Na yina kuna beto . . . Ba ke zimbana na luzolo ya bawu mosi.

79 Mpe na yina, kuna, Meda tubaka na munu, yandi tubaka, “Bill, samu na yinki yina?” yandi tubaka.

80 “Oh,” mu tubaka, “ya kele kaka mpeve ya yinsi.” Mpe mu tubaka, “Ntangu beno ke kwenda na Allemagne, bawu ke na mpeve mosi. Kwenda na Finlande, bawu ke na mpeve ya yinsi. Beno kwiza na Amerika, beto kele na mpeve ya yinsi.”

81 Mpeve ya beto ya yinsi kele kusekisa, kele bansaka. Beno zaba samu na yinki? Ba me tungama na Malongi ya bantumwa. Beto me tungama na zulu ya lutwadusu ya bantu ya nene, mutindu Washington, Lincoln. Kasi beto me basika na lufulu yina, mpe beto zaba yina ke vingila beto. Beto zaba ti bombe atomique me sonika nkumbu ya beto na zulu ya yawu. Beto zaba ti kimpika me vwanda na ntuala ya beto. Beto fuluka ve na mabanza ya beno mosi.

82 Ya ke bambuka munu moyo, na bantu yayi ke sekisaka, ke kwenda kuna mpe—mpe ke tuba mambu yayi ya buzoba, mpe ke sala mambu yayi nionso, mpe bakento ke na kusalaka mutindu bawu ke na kusalaka, mpe babakala, kintwadi. Yawu ke bambuka munu moyo na mwana-bakala yina vwandaka luta na maziama, ke bula mwita, ke meka na kukwikila yandi mosi ti yandi kele ve na boma. Kieleka, yandi kele na boma. Beno me mona? Yandi ke vuna muntu mosi ve. Yawu yina yandi ke bula mwita. Beno me mona? Yandi ke meka kutuba ti yandi ke na boma ve, kasi yandi ke na boma. Mpe yawu yina diambu, bubu yayi.

83 Kasi, oh, wapi kivuvu ya kusakumuka samu na mukwikidi, yina me telemisa maboko, samu ti mpulusu ya beto me belama. Ntangu yandi ke mona bima yayi ke na kumonika, ya kele ntangu ya nene samu na mukwikidi.

84 Ntangu yayi, bima yayi, yina, ke vumuka na banzutu ya beto. Beno me monaka ntete yinti, wapi mutindu yawu ke

sala kingolo-ngolo samu na luzingu? Ya ke zola kuzinga. Mpe beno ke tala kibulu, wapi mutindu na—na lufwa, wapi mutindu yandi ke nwanaka. Beno ke mona muntu, bima nionso, yinza ke na kunionga. Beto, na kati ya beto mosi, ke na kunionga. Beno me mona? Beto zaba ti kima mosi ke tambula mbote ve. Beto ke mona, na banzila yayi, ti kima mosi me zimvana, na muntu mpe na ntoto. Luvangulu na mutindu ya yawu nionso, me zimvisa kima mosi, samu beto ke mona yawu na Ndinga yayi me twadisama na kimpeve ti ya ke na kunionga samu na kikuma mosi. Beno, beno ke vumuka ve kana ya kele ve na kikuma samu na yawu.

Mutindu mu zonzaka samu na tinta, ya kele na kikuma mosi.

⁸⁵ Ya kele mutindu mosi ntangu beto ke sambila samu na bambevo; tii beno ke kuzwa dyambu ya yawu! Mu zaba nkisi, kasi mu fwana kuzwa dyambu. Kikuma yawu yina ba vision ke na nsatu mingi mpe ke na mfunu mingi; ya ke talisa mansweki ya ntima, ke tuba na muntu yina beno me sala kifu ya beno, mpe yina beno fwana sala. Beno me mona? Ya fwana vwanda mutindu ya bankisi beno ke baka, to wapi mutindu ba ke pakula mafuta na zulu ya bayintu ya beno, to wapi mutindu muntu mosi ke boka na zulu ya beno; kana ya kele na kima mosi ke tambula mbote ve, yandi ke vwanda kaka kuna. Mu tubaka “yandi,” ya kele Satana.

⁸⁶ Beno me mona, bubu yayi, wapi mutindu beto me kwenda ntama na kimunganga, na nkisi, beto me zaba kaka kima mosi ve samu na bima yayi. Beno ke tuba, “Yandi kele na cancer.” Mbote, yina kele kima mosi ve. Ti, yina—yina kele kaka kupesa yawu nkumbu. Yina kele bankumbu ya minganga, cancer. Yina ke na kima ya kusala ve na yina yawu kele. Yina kele nkumbu beto ke bokilaka yawu. Beto ke bokilaka yawu kaka na nkumbu yina, cancer. Kasi, ya kieleka, yina yawu kele, kana beto longuka yawu, yawu kele diabulu.

⁸⁷ Ntangu yayi, beto ke tuba “disumu.” Beto ke bokilaka yawu kaka disumu. Beno longuka yawu. Yinki kele disumu? Bantu mingi ke tubaka, “Kunwa malafu, kusala kindumba.” Ve, ve. Yina kele binama ya disumu. Beno me mona? Yawu yina disumu ke nataka, beno me mona. Kasi disumu ya kieleka kele kukondwa lukwikilu. Ya ke kisika yina—ya ke kisika yina ba me pesa yawu nkumbu mosi mpe ba ke bokila yawu. Kana beno kele mukwikidi, beno ke sala bima yina ve. Kasi wapi mutindu beno ke meka na kuvwanda ya santu beno mosi, mpe wapi mutindu musambidi beno ke meka na kuvwanda; kana beno ke sala bima yayi, beno ke muntu ya kukondwa lukwikilu. Yina kele Masonuku.

⁸⁸ Ntangu yayi, kima mosi me zimvana, mpe ya ke na kunionga. Ya ke na kumeka kuvutuka, samu na kuvutuka na mutindu ya yawu ya kisina.

⁸⁹ Beno ke banza ti muntu mosi me kubwa na ntoto, kuna na kati ya dibulu ya yinda kisika mosi kuna, mpe ke meka na kunwana, ke meka na kumata, ke na kubenda? Ba fwana, na mutindu mosi to yankaka, kubasika na dibulu yayi. Bawu kele ve na mutindu ya bawu ya ntete. Mpe, ba ke na kuboba, mutindu bantu ya boma. Ba ke mata na bibaka, ke sala makelele, to ke sala mambu ya mutindu na mutindu. Ba ke—ba ke na kunionga samu ti ba ke zola vutuka na mutindu ya bawu ya ntete.

⁹⁰ Yawu yina muntu, yina me simbama na maladi, bampasi ya mutindu na mutindu. Na ntangu mosi bawu vwandaka ve mutindu yina, kasi bawu ke na kunionga. Samu na yinki? Bawu ke ya kusungama ve. Kima mosi ke tambula mbote ve. Mpe ba ke na kunionga, mpe ba ke meka na kuvutuka na kisika yina ba vwandaka ntangu ba vwandaka na mavimpi ya mbote.

⁹¹ Mpe ntangu yinza mpe bantu, mutindu Biblia me tuba, “ke na kunionga,” ya ke talisa ti ya kele na kima mosi, ti ba kele ve na mutindu bawu lendaka vwanda. Ba me kubwa kisika mosi kuna. Ntangu yayi, beto ke na nsatu ya muntu ve samu na kutendula yawu samu na beto. Beno me mona? Samu ti, kieleka, beto zaba ti ya vwandaka Luzingu ya Kukonda nsuka, bawu kubwaka kuna. Mpe bawu zimbisaka bamuswa ya bawu na zulu ya Luzingu ya Kukonda nsuka, na nzila ya kubwa ya Adam mpe Eve, yina kubwaka na Luzingu ya Kukonda nsuka, tii na lufwa, na disamba ya Eden, mpe nataka bima nionso, na nsi ya bawu, na lufwa.

⁹² Yinti me kufwaka ntete ve, na ntwala ya Adam. Kibulu zolaka kufwa ve, na ntwala ya Adam. Mpe ya kele kaka na kima mosi yina lenda kufwa ve, mpe ya kele Nzambi, samu ti Yandi kele ya Kukonda nsuka. Mpe yina kele kaka mutindu mosi beno lendaka kebama na lufwa, beto fwana kuzwa Luzingu ya Kukonda nsuka na kati ya beto, samu na kuvwanda bana ya babakala mpe bana ya bakento ya Nzambi.

⁹³ Kasi ntangu beto kufwaka, mutindu mu tubaka na Nsangu na suka yayi, samu na kusumuka, beto me teka muswa ya beto ya bukuluntu mpe me sabuka dibulu yayi. Ntangu yayi beto kele na lweka yankaka ya diboko ya Nzambi, na lweka yankaka yayi ya dibulu. Ntangu yayi, kieleka, ntangu Adam kubwaka, na lufwa, yandi nataka lufwa na zulu ya luvangulu nyonso.

⁹⁴ Ntangu yayi, ba pesaka yandi kimpwanza ya kusoola. Ba pesaka yawu na bawu mutindu beto, samu na kusala nsodolo. Ntangu yayi, Adam na Eve, na mbandukulu, ya vwandaka na yinti ya mambote mpe ya yimbi na ntwala ya bawu, mpe yinti yina mosi kele na ntwala ya mosi na mosi mpe—mpe mosi na mosi ya beto. Beno me mona, Nzambi ke na kusalaka ve samu na Adam to Eve. . . Beno ke tuba, “Mbote, ya kele foti ya bawu.” Ve, ntangu yayi ya kele ve. Ya kele foti ya beno. Beno lenda ve kutula yawu na zulu ya Adam ntangu yayi. Beno fwana tula yawu na

zulu ya beno mosi, samu ti mbote mpe yimbi kele na ntwala ya beno. Beto kele na lufulu mosi mutindu Adam mpe Eve.

⁹⁵ Kasi, beno me mona, ntangu beto sumbamaka, beto zola dyaka ve nsodolo ya beto mosi, kasi beto zola nsodolo ya Yandi. Beno me mona? Beno me mona?

⁹⁶ Ntangu yayi, Adam na Eve zolaka sala nsodolo ya bawu mosi. Ba zolaka kusala yawu, ba zolaka zaba yina vwandaka kuzwa ndwenga, na yina bawu mekaka yawu, mpe yawu nataka lufwa.

⁹⁷ Ntangu yayi, ntangu muntu me sumbama, yandi ke kipe diaka ve luzabu ya lukolo. Yandi ke kipe diaka ve bima ya yinza, ndwenga ya yinza. Yandi zola nsodolo mosi ve ata fioti. Klisto vwandaka nsodolo ya yandi, mpe kaka yina. Yandi me sumbama. Yandi zola diaka ve kukitwadisa yandi mosi. Yandi zola muntu ve kuzonza na yandi kisika ya kukwenda mpe yinki kusala. Yandi ke vingila kaka mpe ke mona nsodolo ya Mvangi ya yandi. Beno me mona? Na yina yandi ke kwendaka na Nkumbu ya Mvangi ya yandi, ntangu Mvangi ke tubaka na yandi na kukwenda. Beno me mona?

⁹⁸ Kasi muntu ke sosaka ndwenga, tala yina yandi ke sosaka, “Mbote, paroisse yayi kele mbote mingi; kasi ba ke futa munu mbongo mingi kuna, na yina mu ke kwenda kuna.” Beno me mona? Beno me mona, ndwenga.

⁹⁹ Ntangu yayi, ntangu Adam sumukaka, samu yandi kuwaka mabanza ya kento ya yandi na kisika ya kukangama na Ndinga ya Nzambi, ya kele yina salaka disumu. Kento ya yandi banzaka na Satana, mpe na manima yandi pesaka mbuma na Adam, mpe Adam yambulaka Ndinga mpe tekaka nionso.

¹⁰⁰ Yandi zimbisaka, diaka, difwa ya yandi, ntangu yandi zimbisaka ngwisani ya yandi mpe muswa ya yandi na Luzingu. Beno bambuka moyo, “Kilumbu yina beno ke kudia yawu, kilumbu yina beno ke kufwa.” Mpe ntangu yandi zimbisaka Luzingu ya yandi, yandi zimbisaka diaka difwa ya yandi na luzingu, samu yandi vwandaka na luyalu ya muvimba ya ntoto. Yandi vwandaka nzambi ya ntoto. Nzambi kele Nzambi ya yinza, bisika nyonso. Kasi mwana ya Yandi kuzwaka ntoto yayi na yisi ya luyalu ya yandi mosi. Yandi lenda zonza, yandi lenda pesa bankumbu, yandi lenda telemisa yinza, yandi lendaka sala nyonso yina yandi zolaka. Beno me mona? Kasi, ntangu yandi salaka mutindu yina, yandi zimbisaka difwa ya yandi.

¹⁰¹ Ntangu yayi, Adam lendaka tuba, “Bika mongo yayi, awa, kukwenda kuna,” mpe ya zolaka sala yawu. Adam lendaka tuba, “Bika yinti yayi, awa, kuvusama mpe kundama kuna,” ya ke sala yawu. Beno me mona? Samu yandi vwandaka na luyalu ya muvimba, ya nene, mutindu nzambi ya fioti na nsi ya Nzambi Tata ya beto, samu yandi vwandaka mwana ya Nzambi.

102 Ntangu yayi beto lunga telema awa ve na mwa ntangu fioti samu na kubaka dilongi mosi ya kieleka! Beno me mona? Oh! Na yina, kana Menga me sukula yawu, yinki samu na ntangu yayi? Beno me mona? Beno tala yinki Mwana ya Nzambi yayi, Adam ya zole, salaka. Beno me mona? Mpe yandi tubaka, “Beno mpe ke sala bisalu yina Mu ke sala, beno ke sala yawu.” Beno me mona?

103 Adam zimbisaka difwa ya yandi, ntoto. Ntangu yayi, yawu lutaka na diboko ya yandi tii kuna yandi tekaka yawu, na Satana. Yandi tekaka lukwikilu ya yandi na Nzambi, samu na mabanza ya Satana. Na yina, Luzingu ya yandi ya Kukonda nsuka, muswa ya yandi na Yinti ya Luzingu, muswa ya yandi na ntoto, vwandaka ya yandi, mpe yandi me zimbisa nionso yayi na maboko ya Satana. Yandi me lutisa yawu na diboko ya yandi na Satana. Na yina, ntangu yayi, ya me vwanda, ya me vutuka mpe ya me kuma mvindu. Mpe nkuna ya Adam me bebisa difwa yina Adam zolaka kuzwa, ya kele ntoto. Ya kele kieleka, beno me mona, nkuna ya Adam.

104 Mu telamaka, kilumbu yina, kuna na Tucson sika wapi mu ke zingaka. Mpe mu vwandaka tuba na muntu mosi, kuna na zulu ya mongo, mu vwandaka tala na nsi. Mu tubaka, “Yinki nge ke banza! Ti, bamvula nkama tatu me luta, Papago ya kiboba zabukaka na kizunga na zulu ya travois ya yandi, na squaw ya yandi na bana ya kuvwanda na manima, yandi telamaka kisika mosi kuna mpe yandi vwandaka zinga na ngemba. Ya vwandaka na kindumba ve, wiski ve, bansaka ya mbongo ve, kima mosi ve na kati ya bawu. Ba vwandaka zinga ya kuvedila. Mpe ba-coyote vwandaka luta na balweka ya bamasa, bampimpa nionso, ba vwandaka luta na Tucson awa, ke na kuboka. Mpe ba-prosopis mpe ba-cactus vwandaka basisa bafelele kuna na bakumu. Mpe Yehowa na kutalaka yawu mpe lendaka kuseka. Kasi mundele me kwiza mutindu yina, mpe yinki yandi me sala? Yandi me kuvusa ba-cactus. Yandi me bebisa yinsi, na manzanza ya bierre mpe milangi ya wiski. Yandi me bebisa bumuntu ya yinsi. Mutindu mosi kaka yandi lendaka basisa ba-Indien vwandaka kufwa madia ya yandi, bison.”

105 Ntangu mu vwandaka tanga ntangu mu vwandaka na Tombstone, kilumbu yina, na kati ya musée, mpe mu monaka bafoto ya Geronimo. Mpe mingi na kati ya beno lendaka banza ti Gedere vwandaka kimpumbulu. Samu na munu, yandi vwandaka Americain ya kieleka. Yandi vwandaka kaka kunwana samu na yina vwandaka mbote, yina Nzambi pesaka yandi: ntoto, mpe yinsi, mpe kisika ya kuzinga. Mu ke nganina yandi ve. Mpe ntangu basoda yina ya mindele kwisaka kuna mpe, na ngolo, bakaka yinsi, mpe ba kufwaka bawu mutindu banzinzi. Mpe ya vwandaka kuna foto ya kieleka ya ba-quartier général ya minganga ya Geronimo, to lupitalu ya yandi. Ya vwandaka na babulanketi zole to tatu ya kutanda na zulu ya kitini ya prosopis. Mpe bantu yayi lwalaka, ba-Americain ya kieleka, ya kieleka, ba

Indien, yina vwandaka nwana samu na bamuswa ya bawu yina Nzambi pesaka bawu. Mpe kuna, Geronimo na bébé ya yandi mosi, na luketo, ya kutelema kuna ke tala binwani ya yandi, ke basisa menga ya bawu, ke na kufwa, kukondwa penicilline to kima mosi ve, ya vwandaka ve na mutindu ya kusadisa bawu; ba-American ya kieleka, yina Nzambi fidisaka kuna! Na manima beno ke bokila yandi kimpumbulu? Mu ke bokila yandi muntu ya mbote.

¹⁰⁶ Cochise zolaka kwenda ata fioti ve. Yandi vwandaka kiboba ya bakala. Kasi Makesa ya Amerique, sungikaka bankonga ya yandi nionso, mpe bawu kwendaka kuna mpe bawu kufwaka bison. Ba vwandaka sala mayoto, mpe Sharpe salaka munduki ya ba-bison, mpe ba vwandaka kwenda kuna mpe vwandaka tuba, “Oh, mu me kuzwa kilumbu ya mbote bubu yayi,” ya kubula masasi, tuka kuna na—na wagon ya bima, to ditoma ya bizieti. Ba vwandaka tuba, “Mu me kufwa makumi yiya bubu yayi.” Ba-bison ya madidi, yina zolaka bumba dikanda ya movimba ya ba-Indien, bamvula zole to kulutila yina. Yinki bawu salaka na bawu? Ba vwandaka bika yawu kuna na ntoto ya kuyuma. Niama ya kupola ya ntama yina vwandaka fulusa na kizunga, mpe vwandaka pesa nsunga ya yimbi na kizunga, ba-coyote vwandaka kudia yawu.

¹⁰⁷ Ntangu Indien vwandaka kufwa bison mosi, ya vwandaka na mukumbu ya nsambulu. Yandi vwandaka baka ba-sabot ya yandi, vwandaka bumba yawu samu na kusala banzungu. Ba vwanda kudia nsuni ya yawu, ata mpe nsuni ya bima ya kati. Ba vwanda baka nsuni ya yawu nionso mpe ba vwanda namika yawu samu na kuyumisa yawu. Ba vwandaka yumisa mpusu ya yawu, mpe ba vwandaka sala bilele mpe batenta. Ya vwandaka na kima mosi ve. . .

¹⁰⁸ Kasi, ntangu mundeke kwisaka, kimpumbulu kele mundeke. Yandi kele muntu ya kukondwa luzitu. Mpe yandi kwisaka mpe yandi kufwaka ba-bison yina, mpe kufwaka na nzala ba-Indien yina.

¹⁰⁹ Muntu nionso ya kieleka ke nwana samu na bamuswa yina yandi me kuzwa na Nzambi. Yina bawu salaka na Indien ya Amérique, ya kele tasi na zulu ya dalapo ya Amérique. Na manima ya nionso, nionso yina vwandaka ya yandi.

¹¹⁰ Yinki beno ke banza kana Jap- . . . Japan, to—to beto tuba, Russie ke kwisa, mpe ke tuba, “Beno basika awa! Beno kwenda ntama kuna,” mpe—mpe ba ke sala na beto mutindu beto mpe bana ya beto salaka ba-Indien yina? Kasi, beno bambuka moyo, beto kunaka, mpe ntangu yayi beto ke buka mbuma. Yina ke musiku ya Nzambi, beno zaba. Ya kele na ntangu ya kukuna, mpe na manima ya kele na ntangu ya kubuka bambuma. Mu banza ti ya kele mbote mingi ve. Yinga, tata.

111 Ntangu yayi yinki salamaka? Nkuna ya kubeba ya Adam nataka mvindu mpe bebisaka yinsi. Beno zaba ti Biblia me tuba yawu? Mpe samu ti yandi salaka yawu, nkuna ya kubeba ya Adam, Nzambi ke bebisa bawu. Beno zola kutanga yawu? Beto tala. Mu sonikaka yawu awa. Beno baka Apocalypse, kapu 11, mpe beto ke tala. Beto ke mona yawu na Apocalypse, kapu 11, mpe beto ke mona yina Nzambi me tuba samu na bawu yina ke na kubebisa yinza. Kapu 11, mpe beto baka nzila ya 18, mu ke kwikwila ya kele, 11:18. Beto me kuma kisika yango.

Mpe bayinsi vwandaka na nganzi, mpe nganzi ya nge me kwisa (ntangu yayi beno tala mbote nganzi ya Nzambi), mpe ntangu me lunga, yina ba ke fundisa bantu ya kufwa, mpe ti nge ke pesa musendo na misadi ya nge baprofete, mpe na basantu, mpe na bayina ke zitisaka nkumbu ya nge, bana ya fioti mpe bakuluntu; mpe nge ke bebisa bayina ke bebisaka yinza.

112 Yinki ba ke sala? Ba ke buka yina ba kunaka. Ya kieleka. Ntangu beno ke mona disumu ke kwenda mbangu na babalabala! Bantu yikwa, na nkokila yayi ya Lumingu, bindumba yikwa ke salama na mbanza yayi na nkokila yayi? Bankama yikwa ya bakento ke zenga bansilulu ya bawu ya makwela, na kati ya mwa dibulu yayi awa, ba ke bokilaka Jeffersonville? Mambu yikwa ya kubasisa bivumu yina beno ke banza ba me kuzwa na Chicago, na bilumbu makumi tatu? Kati-kati ya makumi zole na tanu mpe makumi tatu ya mafunda na ngonda mosi, na nganda ya bayina ba me zabisa ve. Ba-wiski yikwa ba me kunwa na mbanza ya Chicago? Yinki beno ke banza me salama na Los Angeles na mpimpa mosi? Bambala yikwa ba me baka Nkumbu ya Mfumu na mpamba, na mbanza ya Jeffersonville bubu yayi? Ya kele mbote mingi ntangu yayi, to ya vwandaka mbote mingi ntangu George Rogers Clark kwisaka na zulu ya rado ya yandi? Beno me mona, beto me nata mvindu mingi na yinza na mvindu ya beto, mpe Nzambi ke bebisa bayina ke bebisa yinza. Nzambi tubaka yawu.

113 Mu banzaka ntangu nionso ti ya vwandaka na kima mosi kuna na kati ya munu, yina vwandaka tindika munu na kumata na myongo mpe kutala bima mutindu Nzambi salaka yawu.

114 Mu ke yinaka, Floride, kisika ba kele na bamaba yina me salama na bantu. Mpe, oh, la la, mu ke zolaka mingi kumona bangandu ke bula mukila, kuna na kati ya banseke, na kisika kumona bansaka yayi nionso mpe nionso yina ke na kusalamaka na Hollywood, mpe bakungenga yayi nionso, mpe nkonga yayi ya bantu ya kulawuka na malafu. Mpe, oh, la la, mu ke tuba kaka, “Kilumbu mosi! Kilumbu mosi!” Yinga.

115 Kasi, beno bambuka moyo, Biblia me tuba na beto, na kapu ya 5 ya Matthieu, ti, “Bantu ya lembami ke kuzwa ntoto.” Ya kele kieleka. “Bantu ya lembami mpe ya kukukulumusaka ke kuzwa

ntoto.” Yesu tubaka, “Kiese na bantu ya lembami,” bantu ya kukikulumusya yina ke mekaka ve na kuvwanda kima mosi ya nene, “bawu ke kuzwa ntoto.” Yesu tubaka yawu. Yinga. Ntangu yayi ba bebisaka yawu, mpe Nzambi ke bebisa bawu; kasi bantu ya lembami ke kuzwa ntoto, na manima ba me vedisa yawu.

¹¹⁶ Ntangu yayi, oh, la la! Ntangu yayi, muswa ya munkwa-kima yina ba botolaka kele ntangu yayi na maboko ya Munkwa-kima, Nzambi ya Ngolo nyonso. Muswa ya munkwa-kima ya ntoto, mpe samu na Luzingu ya Kukonda nsuka, ntangu Adam zimbisaka yawu; na yina maboko ya Satana ya mvindu lendaka ve kubaka yawu, na yina ya me vutuka na Munkwa-kima ya kisina, Nzambi Yandi mosi. Beto ke tala yawu, kaka na minuti fioti. Kuna Yandi kele ya kuvwanda na zulu ya Kiti ya kimfumu, na yawu na diboko ya Yandi, muswa ya munkwa-kima. Oh, yina ke sala munu kuwa musambidi. Muswa ya munkwa-kima samu na Luzingu ya Kukonda nsuka, muswa yina ba lendaka telemina ve samu na Luzingu ya Kukonda nsuka, ntangu Adam zimbisaka yawu samu na ndwenga, na kisika ya lukwikilu, yawu vutukaka na maboko ya Munkwa-kima, Nzambi ya Ngolo nyonso. Yinki kima yayi ya nene!

¹¹⁷ Mbote mingi, na kuvingilaka. Yinki ya ke na kusala? Na maboko ya Nzambi, ke na kuvingilaka muswa ya mpulusu kulombama. Yandi salaka nzila ya mpulusu, Yandi salaka nzila samu na kuvutuka, mpe kilumbu Mukudi ke vutula yawu. Beno me mona kisika beto ke na kukuma ntangu yayi? Beto ke tala Muntu yayi ya kuvwanda na zulu ya Kiti ya kimfumu. Mbote mingi, ke na kuvingilaka mpulusu kulombama, mpulusu ya yawu.

¹¹⁸ Yinki kele Buku yayi ya Mpulusu, muswa ya munkwa-kima, muswa yina ba lendaka telemina ve? “Beno ke tuba, ‘muswa yina ba lendaka telemina ve?’” Yinki muswa yina ba lendaka telemina ve zola kutuba? Ya zola kutuba ti kusosa-sosa ya kieleka me salama ti ba me kwenda tii na mbandukulu ya yawu. Mutindu mwa—mutindu mwa ditono yina ya ntinta na suka yayi, ntangu ya me kubwa décolorant yayi, ya me vutuka tii na kisika ya yawu. Mpe ntangu ba me funguna disumu mpe ya me kubwa na Menga ya Yesu Klisto, oh, la la, ya ke pesaka muswa yina ba lendaka telemina ve, ya ke vutuka mbala mosi na Mvangi dyaka. Beno me kuma mwana ya Nzambi. muswa yina ba lendaka telemina ve kele maboko ya Ngolo nyonso. Oh, la la!

¹¹⁹ Mpulusu ya yawu zola kutuba kubaka nyonso yina zimbanaka na nzila ya Adam mpe Eve. Oh, la la! [Mpangi Branham me bula maboko ya yandi kintwadi mbala mosi.] Yinki ya lenda sala na Muklisto yina me butuka mbala ya zole! Kubaka ya muvimba muswa yina ba lendaka telemina ve, muswa ya munkwa-kima samu na Luzingu ya Kukonda nsuka, ya zola kutuba ti beno me kuzwa nyonso yina Adam mpe Eve zimbisaka.

Fiou! Yinki beno ke tuba samu na yawu, mpangi? Kubaka ya muswa yina!

120 Adam lendaka ve kuzitisa yina mpulusu vwandaka lomba. Na manima yandi monaka ti yandi zimbisaka yawu, yandi sumukaka mpe yandi kabwanaka yandi mosi na Nzambi, yandi vwandaka na lweka *yayi* ya dibulu, samu ti yandi lendaka ve kuvulusa yawu. Yandi zolaka sala yawu ve, samu ti yandi—yandi vwandaka na nsatu ya mpulusu, yandi mosi, na yina yandi lendaka ve kusala yawu.

121 Kasi musiku lombaka Tata Mukudi. Musiku ya Nzambi lombaka Tata Mukudi. Beno zola sonika yawu, “Tata Mukudi,” ya kele na Levitique 25.

122 Beto ke vwanda ve na ntangu ya kulonguka yawu mbote-mbote, samu, beno zaba, konso—konso kitini ya masonuku ke lomba nkokila mosi. Beno me mona?

123 Kasi musiku ya Nzambi me kuzwa muyingi. Ntangu yayi, yinki kana Nzambi pesaka ve muswa ya kubaka muyingi? Kasi zola tumaka Yandi na kusala yawu. Ti, muntu vwandaka ve na nzila ya kuvutuka, mpe ya kele ve na nzila samu na yandi na kuvutuka. Yandi vwandaka me zimbana. Kasi lemvo ya Nzambi kutanaka na Tata Mukudi yayi na Muntu ya Yesu Klisto. Musiku lombaka yawu. Lemvo zitisaka misiku ya yawu. Oh, lemvo ya ngitukulu, mutindu mbote ya ke wakana! Musiku ya Nzambi me lomba muyingi yina zaba diambu ve.

124 Mpe nani vwandaka muntu yina zabaka diambu ve? Bantu nionso me butuka na mpusa ya nzutu, na manima ya sexe, bantu nionso. Mpe yina vwandaka kaka ve, yandi zimbisaka muswa samu na Luzingu ya Kukonda nsuka mpe samu na kuvwanda ntinu na zulu ya ntoto.

125 Oh, ntangu mu ke banza na Masonuku yina, “Samu ti Nge me vulusa beto na kuvutuka na Nzambi, mpe beto lenda yala mpe kuvwanda bantinu mpe banganga-Nzambi na zulu ya ntoto.” Oh, la la! Yinki? Tata Mukudi! Oh, yinki disolo beto ke kuzwa awa!

126 Beno tala, musiku lombaka Tata Mukudi samu na kuvulusa kima yina me zimbana. Lemvo me zitisa musiku yayi kati na Muntu ya Yesu Klisto. Tata fwana butuka na kati ya bantu.

127 Ntangu yayi, wapi mutindu beto lenda vwanda, ntangu muntu nyonso yina me butama fwana . . . Mpe muntu nionso yina lendaka mona ve ti ya vwandaka bisalu ya sexe, mbote, yandi kele ya muvimba ya kufwa meso, beno me mona, samu ti muntu nyonso yina me butukaka na kento.

128 Mpe Nzambi lombaka Tata Mukudi, mpe Yandi fwana vwanda muntu. Oh, la la! Yinki beno ke sala ntangu yayi? Musiku lombaka Tata Mukudi.

129 Ntangu yayi, Yandi zolaka baka Wanzio ve. Yandi zolaka kuzwa muntu, samu ti beto kele ve na kimpangi na Bawanzio.

Beto kele na kimpangi na mosi na yankaka. Wanzio kubwaka ata fioti ve. Yandi kele kivangu ya mutindu yankaka, yandi kele na nzutu ya mutindu yankaka. Yandi sumukaka ata fioti ve to kima mosi ve. Yandi kele ya kuswaswana.

Kasi musiku lombaka Tata Mukudi.

¹³⁰ Mpe konso muntu na zulu ya ntoto butukaka na sexe. Ntangu yayi, beno ke mona ve, kele kisika yina yawu me katuka. Ya kele kisika disumu bandaka. Na yawu beno ke mona kisika ya kele ntangu yayi? Ya ke kisika yina, nkuna ya beno ya nioka, me kota. Beno me mona?

¹³¹ Ntangu yayi, beno tala, Tata Mukudi. Mpe Mukudi, Tata Mukudi, fwana butuka na dikanda ya bantu. Awa, yina ke kotisa beto na mpasi. Kasi beno bika mu bula Mpungi samu na beno. Lubutuku ya bumwense basisaka mbuma. Amen. Mbutukulu ya bumwense basisaka Tata Mukudi ya beto. Yankaka ve kasi Nzambi ya Ngolo nionso me kuma Emmanuel, mosi na kati ya beto. Emmanuel! "Tata Mukudi" me ndimama. Beno me mona mutindu Nzambi ke salaka mambu, mpe kima mosi ve beto lenda sala. Kasi na yina lemvo me kwisa mpe me fika musiku yina, mpe me buta mbuma. Amen!

¹³² Oh, ntangu beno ke kuma kuna na Yinzo! Ntangu mu ke kuzwa mwa yinzo ya munu kuna; mutindu Mpangi Neville ke yimbaka yawu. Ntangu beno nionso ke kuwa kima mosi kuna, na suka mosi, ke yimba, "Lemvo ya ngitukulu! Muningu ya lembami, yina vulusaka muntu ya mpamba mutindu munu!" Beno ke tuba, "Nkembo na Nzambi! Mpangi Branham ya luzolo me kuma kuna. Yandi yina kuna, beno me mona." Yinga.

Oh, ya kele lemvo yina longaka boma na ntima
ya munu,
Ya vwandaka lemvo na boma ya munu ya
kulembika;
Mutindu ntalu lemvo yango me monana
Na ngunga mu kwikilaka ntete!

¹³³ Beno vingila tii beto ke kuma kuna, na mwa ntangu fioti! Oh, la la! Beno tala ntangu yayi. Buku . . .

¹³⁴ Buku ya Ruth ke pesa kizizi ya kitoko na yayi, mutindu Boaz. . . Mpe Naomi zimbisaka bima ya yandi. Beno, beno zaba. Beno waka munu kulonga yawu, mutindu yina ve? Beno telemisa maboko na beno na zulu kana beno waka munu kulonga yawu. Na yawu, beno me bakula, beno me mona. Boaz zolaka kuma mukudi. Mpe yandi vwandaka yandi yina kaka zolaka salama. Yandi zolaka vwanza mpangi-bakala, musumbi ya pene-pene. Mpe, na sika ya kukuula Naomi, yandi bakaka Ruth. Ya vwandaka Yesu, Boaz vwandaka kifwanukusu ya Klisto. Mpe ntangu Yandi kuulaka Israël, Yandi kuzwaka Kento ya makwela ya Bantu ya makanda. Na yina, beno me mona, ya kele kitoko

mingi! Beto kele na yawu na bande, kieleka, awa kisika mosi, beno ke zola kuzwa yawu.

¹³⁵ Ntangu yayi beno tala, ntangu yayi, Yandi fwana vwanda Tata. Na yawu, beno me mona, Wanzio lenda sala yawu ve. Muntu lenda sala yawu ve; ya fwana vwanda bakala, kasi yandi lenda ve kubutama na kento, kisalu ya sexe. Na yina, mbutukulu ya bumwense, Mpeve-Santu fukaka Marie na kivudi. Na yawu, Yesu vwandaka Juif ve. Yesu vwandaka Muntu ya makanda ve. Yesu vwandaka Nzambi. Ya kieleka. Menga ya Yandi katukaka ve na kisalu ya sexe. Yandi vwandaka Menga ya santu, yina Nzambi vangaka. Mpe beto me kuzwa mpulusu ve na nzila ya menga ya Juif, to dyaka beto me kuzwa mpulusu ve na nzila ya menga ya Muntu ya makanda. “Beto me kuzwa mpulusu na Menga ya Nzambi.” Yawu yina me tuba Biblia. Ya ke tuba yawu. “Beto me kuzwa mpulusu na nzila . . .”

¹³⁶ Na yina, beno me mona, Yesu vwandaka Nzambi. Yandi vwandaka ve Muntu ya tatu, Muntu ya yiya, Muntu ya zole. Yandi vwandaka Muntu. Yandi vwandaka Nzambi, beno me mona. Yandi vwandaka Nzambi, Emmanuel. Nzambi kulumukaka na Nkembo ya Yandi, monisamaka Yandi mosi. Mu ke zolaka disolo yina, ya Booth-Clibborn, nkunga yina ya nene, ya kitoko mingi.

Yandi kulumukaka na Nkembo ya Yandi,
disolo ya kitoko,

Nzambi ya Munu mpe Mvulusi kwizaka, mpe
Yesu vwandaka Nkumbu ya Yandi.

Yandi butukaka na kidikilu, na nzenza ya
Yandi mosi,

Muntu ya kiadi, ya mawa mpe ya mpasi.

Oh, wapi kukikulumusa, Yandi me natila beto
mpulusu;

Na kati-kati ya mpimpa ya ndombe, kukondwa
kitini ya kivuvu;

Nzambi ya beto, ya kifuluka na lemvo, mpe
lutondo, tulaka na lweka bunene ya Yandi,

Me kukikulumusa samu na kubenda munu
mpe kuvulusa moyo ya munu.

O mutindu mu zola Yandi! Mutindu mu ke
kembila Yandi!

Yandi kele luzingu ya munu, nsemo ya munu,
Nionso na Nionso!

Mukudi ya nene me kuma Mvulusi ya munu,

Mvangi ya nene me kuma Mvulusi ya munu,

Mpe muvimba nionso ya Nzambi zingaka na
kati ya Yandi.

¹³⁷ Yina ke Mosi kaka me zitisa musiku. Lemvo salaka Muntu ya Yesu Klisto. Mpe beto ke mona, Buku yayi ntangu yayi . . .

Nzambi tulaka tenta ya Yandi, yina me katuka na Nzambi, samu na kukuma Muntu. Yandi sobaka mutindu ya Yandi, kubanda na Ngolo nionso, samu na kuvwanda Muntu mosi; samu na kubaka kifwani ya muntu, samu Yandi kufwa, samu na kuvulusa muntu. Benoit vingila tii ntangu beto ke mona Yandi, ntangu “muntu mosi ve kele ya kulunga.” Benoit me mona? Mbote mingi.

¹³⁸ Na kati ya Biblia, na Buku ya Ruth, mutindu benoit ke tanga yawu, benoit ke tala, muntu ya mutindu yina ba ke bokila “goel,” g-o-e-l. Ba bokilaka yandi goel, to, yawu vwandaka muntu yina lendaka zitisa misiku. Mpe goel fwana vwanda na lenda ya kusala yawu, fwana vwanda na luzolo ya kusala yawu, mpe fwana vwanda tata, tata ya pene-pene, samu na kusala yawu.

¹³⁹ Mpe Nzambi, Mvangi, ya Mpeve, kumaka muntu ya dikanda samu na beto ntangu Yandi kumaka muntu, samu ti Yandi lenda baka disumu ya beto na zulu ya Yandi, mpe kufuta ntalu, mpe kuvulusa beto samu na kuvutula beto diaka na Nzambi. Yawu yina. Mukudi yandi yina.

¹⁴⁰ Klisto me vulusa beto ntangu yayi. Beto kele ntangu yayi ya kuvuluka. Kasi Yandi me lomba kima ya Yandi. Ntangu yayi, benoit lenda manga yawu, kasi benoit vingila mwa minuti fioti, benoit me mona. Beto ke mona. Benoit me mona? Yandi me lomba yawu ve. Benoit me mona? Kana Yandi bakaka Buku ya Mpulusu, bima nionso yina Adam vwandaka na yawu mpe bima nionso yina yandi zimbisaka, Klisto ke vulusa yawu. Mpe Yandi me vulusa beto yimeni. Kasi Yandi me baka luyalu ntete ve; Yandi lenda ve tii ntangu yina ke lunga. Mpe na manima ke kwiza mvumbukulu, mpe na manima ntoto ke vutuka dyaka ya malumu. Mpe na yina Yandi ke baka luyalu, luyalu ya Yandi yina Yandi kuzwaka na ntangu Yandi vulusaka beto, kasi ke sala yawu na ntangu yina ba me kubika. Oh, la la!

¹⁴¹ Yayi kele ya kulakisa na Buku ya Bidimbu Sambwadi yayi yina beto ke na kuzonzila awa. Mbote mingi. Buku ya Mpulusu, yawu nyonso kele ya kulakisa awa. Nionso yina Klisto ke sala na nsuka ke monisama na beto na sabala yayi, na Bidimbu Sambwadi, kana Nzambi ke bika beto. Benoit me mona? Mbote mingi. Ya ke monisama pwelele. Mpe me monisama, mutindu Bidimbu me zibuka mpe me basika na beto, na yina beto lenda mona yina manaka yayi ya nene ya mpulusu kele, mpe ntangu mpe wapi mutindu ya ke salama. Ya kele nyonso ya kubumbama na kati ya Buku yayi ya mansweki awa. Ya kele ya kukanga, ya kele na Bidimbu Sambwadi, mpe na yina Mwana-dimeme kele Yina kaka lenda kubuka yawu.

¹⁴² Ntangu yayi . . . (Benoit lemvokila munu.) Beto me bakula . . .

¹⁴³ Ntangu yayi, kana benoit zola tala na Masonuku, benoit lenda baka kuna na Jérémie mpe benoit ke mona kuna. Ntangu yandi vwandaka—ntangu yandi—yandi vwandaka kwenda na kimpika na yinsi, benoit zaba, yandi—yandi sumbaka noko ya

yandi . . . Mwana ya noko ya yandi vwandaka na—na ntoto, mpe yandi kwendaka, yandi tekaka yawu. Mpe kana beto baka yawu nionso . . . Beto ke kuzwa yawu diaka na kati ya *Bansungi Sambwadi ya Dibuundu*, bidimbu mpe nionso yina, na kati kuna.

¹⁴⁴ Beno me mona, kinyemo, na Ngwisani ya Ntama, vwandaka mutindu nkasa, mutindu *yayi*. [Mpangi Branham ke sadila bitini ya ba-papié samu na kulakisa mutindu ba vwandaka balula, kukanga, mpe kuzibula rouleau—Mu.] Mpe *awa* vwandaka mansweki, mpe mansweki *yayi* vwandaka ya kubumbama. Mbote mingi, ya vwandaka ya kukanga mpe ya kutula awa, muswa na kima *yayi-mpe-yina*. Na yina, mansweki yina me landa vwandaka ya kuinga ya yina vwandaka difwa *yayi*, mpe ba tulaka yawu awa na lweka *yayi*, muswa ya *yayi-mpe-yina*. Mpe landilaka mutindu yina tii ya vwandaka sala rouleau, samu bantu vwandaka ve na babuku mutindu *yayi* na ntangu yina. Ya vwandaka na rouleau, (bantu yikwa zaba yawu?) yina ba vwandaka bokila rouleau. Mbote, rouleau yina ba me kanga, beno lenda zibula yawu *awa*, samu na kutala mansweki yina vwandaka, mpe kupanza yawu, mpe beno lendaka mona yina muswa vwandaka. Mpe na manima kuzibula yankaka, mpe beno lendaka mona muswa yina vwandaka kuna.

¹⁴⁵ Mpe nionso yina Awa kele Bidimbu Sambwadi, yina ke simbaka mansweki ya Nzambi kubanda mbandukulu ya yinza nyonso ya kukanga na kati Kuna, mpe me monisama na nzila ya Bidimbu sambwadi ya kuswaswana, ti, kana Nzambi zola, Yandi ke pesa beto muswa ya kuzibula Bidimbu *yayi* mpe beto tala na kati ya Buku mpe beto ke mona nionso samu na Yawu. Beno me mona? Oh, mu banza ti beto ke kuzwa ntangu ya nene! Ya kele na mansweki ya mpulusu yina ba me kanga tii . . . Buku *yayi* ba lenda zibula yawu ve tii na Nsangu ya wanzio ya nsuka.

¹⁴⁶ Buku kele kuna. Beto zabaka ti Yawu vwandaka kuna. Beto zaba ti Yawu vwandaka mpulusu. Beto kwikilaka ti Yawu vwandaka mpulusu. Jérémie tubaka, “Rouleau *yayi* fwana vwanda ya kubumba . . .” Mutindu beno ke tanga yawu kuna, yawu yina yandi ke tuba. Ba fwana bumba yawu na banzungu ya ntoto. Beno me mona? Oh, wapi kima ya kitoko kuna mu lenda zonzila, mwa ntangu fyoti. Rouleau *yayi* vwandaka ya kubumba na nzungu ya ntoto yina ntangu mosi kumaka nsuni (nkembo!), kufwaka, vumbukaka diaka, mpe ba bumbaka yawu na nzungu ya ntoto tii ntangu ya lusumbu. Oh, la la! Ya kele kitoko mingi! Mbote mingi.

¹⁴⁷ Ntangu *yayi*, Bansangu *yayi* nionso me bumbama tii kuna, nzungu *yayi* ya ntoto, tii na ntangu ya Nzambi me kubika, na munati-nsangu ya nsuka na ntoto. Mpe bantu nyonso *yayi* vwandaka ya kufundisa, mpe tubaka, “Mu zaba ti Yawu kele kuna. Mu ke kwikila ti Yawu kele kuna.” Mpe bawu nwanaka samu na Yawu, mpe basisaka Yawu mpe basisaka bima *yayi*. Na

lukwikilu bawu kwikilaka Yawu. Kasi ntangu yayi ba ke natila beto Yawu na luzayikisu, mpe na diboko ya Nzambi na nzila ya nsiamisa. Nzambi tubaka yawu. Yandi silaka yawu.

148 Ntangu yayi, ntangu yayi beto tala. Wapi, wapi kisika beto vwandaka? Beto kwenda na nzila ya 2 ntangu yayi. Beto me baka ntangu ya yinda na nzila ya 1, kasi beto—beto—beto baka nzila ya 2. Ntangu yayi, beto ke banza ti beto ke baka ntangu ya yinda ve na yina ke landa.

Mpe mu monaka wanzio ya ngolo kutuba na bandinga ya ngolo, Nani kele ya kulunga na kuzibula . . . buku, mpe na kuzibula bidimbu ya yawu?

149 Ntangu yayi, beno bambuka moyo. Beto tanga dyaka nzila ya 1, samu ti beto vukisa yawu kintwadi.

. . . Mu monaka na diboko ya kibakala ya yandi yina vwandaka na zulu ya kiti ya kimfumu . . .

150 Nzambi! Nani ya kele? Kieleka Munkwa-kima ya kisina ya Buku ya Luzingu. Yandi me simba Yawu. Nzambi me simba Yawu. Ntangu Adam zimbisaka Yawu, Yawu vutukaka na Munkwa-kima ya Yawu ya kisina. Ya kele ya Yandi.

Mpe Jean (na vision) talaka kuna mpe monaka na diboko ya yandi ya kibakala yina vwandaka na zulu ya kiti ya kimfumu buku ba me sonika na kati mpe na ngaanda, ya kukanga na bidimbu sambwadi.

151 Beno me mona, na kati! Ntangu yayi, ntangu beto ke buka Bidimbu yayi, beno ke mona, Ya ke vutuka na kati ya Masonuku, tii na mbandukulu, samu na mosi ya Bidimbu yayi. Nionso, kintwadi, mansweki nionso, kele awa na kati ya Bidimbu yayi. Beno me mona? Mansweki nionso ya Biblia kele na kati ya Bidimbu yayi. Mpe Bidimbu lenda zibuka ve tii na ntangu yina. Mu ke talisa yawu awa, na mwa ntangu fioti.

152 Beno tala. Ntangu yayi, Buku, beno bambuka moyo, kele ya kukanga. Yawu yayi mosi, Yawu yayi, kidimbu yayi. Na yina Mosi yankaka kele ya kukanga, Kidimbu mosi. Yankaka kele ya kukanga, Kidimbu mosi. Ya kele Buku ya Mpusulu. Mpe kima nyonso, kintwadi, ke sala Buku, mpe Yawu kele ya kukanga na Bidimbu Sambwadi. Mpe, na yina, ya kele na ngaanda, ya kele ya kuinga. Mansweki ya Kidimbu kele na kati. Mpe Yawu ke tuba kaka, “Munati-mpunda ya mpembe,” to, “Munati-mpunda ya ndombe,” mpe yina yankaka, na ngaanda. Kasi mansweki ya Buku ya muvimba kele na kati ya Bidimbu yina, kubanda na Genèse tii na Apocalypse. Manaka ya muvimba ya mpulusu me talisama na Bidimbu Sambwadi yayi. Oh, ya kele ntangu ya mfunu. Nzambi sadisa beto na kubakula Yawu! Beno me mona?

153 Ntangu yayi, “Mpe wanzio ya ngolo . . .” Ntangu yayi na nzila ya 2.

. . . *wanzio ya ngolo*, na ndinga ya ngolo, tubaka, *Nani kele ya kulunga* . . . (Ya kulunga samu na yinki?) *Nani kele ya kulunga* na kubaka *buku yina*, . . .

¹⁵⁴ Ntangu yayi beto ke mona. Wapi kisika kele Buku ntangu yayi? Na Munkwa-kima ya Yawu ya kisina, samu ba zimbisaka Yawu na mwana, mwana ya ntete ya Nzambi, na kati ya bantu. Mpe na ntangu yandi zimbisaka bamuswa ya yandi, samu na kuwa Satana, yandi ke pesa . . . Yinki yandi salaka? Yandi ndimaka ndwenga ya Satana na kisika ya Ndinga ya Nzambi. Ntangu yayi, beto lenda ve kusutope awa na mwa ntangu fioti! Bana ya Nzambi ke baka dibanza ya seminere samu na Yawu, na kisika ya Ndinga ya Nzambi. Beno me mona, kima ya mutindu mosi Adam salaka, yandi zimbisaka bamuswa ya yandi. Mpe na ntangu yawu salamaka mutindu yina, mbala mosi yawu vutukaka. Beno lenda ve kumona kisika bansungi yango vwandaka? Beno me mona? Ya me vutuka mbala mosi na munkwa-kima ya kisina.

¹⁵⁵ Mpe Jean, na Mpeve, kele awa na Mazulu. Yandi me zanguka ntangu yayi, na bansungi ya dibuundu, beno me mona, yandi monaka bansungi ya dibuundu. Mpe kuna ba zangulaka yandi, na kapu 4. Yandi tubaka, “Mata mingi na zulu. Mu ke lakisa nge bima yina ke kwisa.”

¹⁵⁶ Mpe yandi monaka Mosi ya kuvwanda na zulu ya Kiti ya kimfumu, na Buku yayi na diboko ya Yandi, na diboko ya Yandi ya kibakala. Beno banza na yawu, ntangu yayi. Mpe, kuna, na Buku yayi vwandaka muswa ya munkwa-kima samu na mpulusu, mpe Yawu vwandaka ya kukanga na Bidimbu Sambwadi.

¹⁵⁷ Mpe na yina Wanzio mosi kwizaka, Wanzio ya ngolo, ke tuba na ndinga ya ngolo, “Nani vwandaka ya kulunga samu na kuzibula Buku; samu na kubaka Buku? Nani vwandaka na kiyeka ya kuzibula Bidimbu? Nani vwandaka na kiyeka ya kuzibula Buku yayi?” Beno me mona, Wanzio yufulaka yawu. Jean monaka yawu. Mpe Yandi tubaka, “Ntangu yayi, nani kele ya kulunga? Ti Yandi . . .” Oh, la la! Mu banza ti ya ke munu ke na kuwa yayi, mutindu yayi. “Kasi bika Yandi yina,” tubaka Wanzio, “bika Yandi . . .” *Awa* kele Buku ya Mpulusu! *Awa* kele manaka ya mpulusu! *Awa* kele mutindu kaka beno ke vwanda ya kuvuuka, samu ti *awa* kele muswa ya munkwa-kima samu na mpulusu ya mazulu mpe ntoto ya muvimba! “Bika Yandi kwisa na ntwala, kana Yandi zola kusala yawu.” Oh, la la! “Yandi tuba ntangu yayi, to Yandi vwanda swi. Ti Yandi kwenda na ntwala mpe lomba Buku yayi. Nani kele ya kulunga na kusala yawu?”

¹⁵⁸ Mpe Jean tubaka:

Ya vwandaka na *muntu mosi ve* na mazulu yina vwandaka ya kulunga; *muntu ve* na zulu ya *ntoto* vwandaka ya kulunga; *muntu mosi ve* na nsi ya *ntoto*,

yina me zingaka mpe me kufwaka, vwandaka ya kulunga. Muntu mosi ve vwandaka ya kulunga.

159 Lubokilu ya Wanzio vwandaka lubokilu samu Tata Mukudi kumonika. Nzambi tubaka, “Mu kele na musiku; Tata Mukudi lenda—lenda vwanza muyingi. Wapi sika Tata Mukudi kele? Nani ke na kiyeka ya kubaka Yawu?”

160 Mpe yawu me katuka na Adam, tii na bantumwa, mpe bapofete, mpe nionso yankaka, mpe muntu mosi ve monikaka. Ntangu yayi, wapi mutindu samu na yina? “Muntu ve na Mazulu, muntu ve na zulu ya ntoto, muntu ve yina me zingaka ntete.” Elie vwanza ya kutelama kuna. Moise vwanza ya kutelama kuna. Bantumwa nionso vwanza ya kutelama kuna, to—to bayina nionso kufwaka; bantu nionso ya santu, Job, bantu ya ndwenga. Muntu nionso vwanza ya kutelama kuna, mpe muntu mosi ve vwanza ya kulunga na kutala Buku, diaka kubaka Yawu mpe kubuka Bidimbu.

161 Ntangu yayi yinki pape mpe nionso yayi ke kuma kuna? Wapi kisika kele évêque ya beno? Wapi kisika kele kulunga ya beto? Beto kele kima mosi ve. Ya kieleka.

162 Yandi lombaka Tata Mukudi na kukwenda na ntuala, kana Yandi lenda sala yawu. Kasi Jean tubaka, “Muntu mosi ve vwanza ya kulunga.”

163 Ya vwanza ve na bantu ya kulunga kuna, ntangu yayi, mutindu Wanzio; mutindu, mumbandu, beto ke tuba, Gabriel, to Michael. Kasi, beno bambuka moyo, ya zolaka vwanza Tata. Beno bambuka moyo, Jean tubaka awa, “Mpe m-u-n-t-u mosi ve,” Wanzio ve, Séraphin ve. Bawu sumukaka ve, kasi Bawu vwanza kaka na kategoli ya luswaswanu. Bawu kubwaka ata fioti ve.

164 Kasi ya zolaka vwanza Tata Mukudi. “Muntu mosi ve,” samu ya vwanza ve na mosi na kati ya bawu kuzwaka mpulusu. “Muntu ve vwanza ya kulunga na kutala Yawu.” Oh, ve! Oh, la la! Na yawu, yawu bakaka Tata ya kimuntu. Mpe yandi lombaka yawu, mpe Yandi monaka yawu ve, kisika mosi ve. Kuvwanza na muntu mosi ve. Évêque mosi ve, archevêque mosi ve, nganga-Nzambi mosi ve, kuluntu mosi ve, ata kima mosi ve vwanza mpe. . . vwanza na busantu mingi ve samu na kutala Buku. Fiou! Oh, la la! Ya kele ngolo mingi, kasi ya kele yina Biblia ke tuba. Mu ke na kuzonzila kaka yina Jean tubaka.

Biblia ke tuba ti Jean “dilaka.”

165 Ve mutindu bantu me longa yawu. Mu vwanza kuwa muntu mosi kulunga yayi kilumbu mosi, yandi tubaka, “Jean dilaka samu ti yandi monaka ti yandi mosi vwanza ya kulunga ve.” Oh! Muntu nyonso na yisi ya Mpeve-Santu zolaka zaba luswaswanu na yawu, beno me mona; na nsi ya lutwadusu ya kimpeve ya Nzambi, lendaka zaba luswaswanu na yawu.

166 Kasi, Jean “dilaka.” Beno tala samu na yinki mu ke banza yandi dilaka. Samu ti, kana muntu ve vwandaka ya kulunga mpe lendaka fungula Buku yayi ya Mpulusu, ngidikulu nyonso vwandaka ya kuzimbana.

167 *Awa* keke Buku, *awa* keke muswa ya munkwa-kima, mpe ba ke pesa Yawu na Tata Mukudi yina lenda zitisa misiku yina. Yina keke musiku ya Nzambi Yandi mosi, mpe Yandi lenda ve kuvweza musiku ya Yandi, mu zolaka tuba. Beno me mona? Nzambi lombaka Tata Mukudi Yina vwandaka ya kulunga, Yina vwandaka na kiyeka ya kusala yawu, Yina vwandaka na kiyeka ya kusala yawu.

168 Mpe Wanzio tubaka, “Ntangu yayi bika ti Tata Mukudi kukwenda na ntwala.”

169 Mpe Jean talaka. Mpe yandi talaka bisika nyonso na zulu ya ntoto. Yandi talaka na yisi ya ntoto. Mpe ya vwandaka ve na muntu. Kuna, luvangulu mpe nyonso vwandaka ya kuzimbana. Ya kieleka, Jean dilaka. Nyonso vwandaka ya kuzimbana.

170 Kudila ya yandi wumelaka ve kasi kaka mwa ntangu fioti, kaka. Na manima mosi ya bakuluntu, tubaka, “Kudila ve, Jean.” Oh, la la! Kudila ya yandi wumelaka ve kasi kaka mwa ntangu fioti.

171 Jean banzaka, “Oh, la la, wapi kisika keke Muntu yango? Tala baprofete; bawu me butuka mutindu mu butukaka. Ya keke na bantu ya ndwenga. Ya keke kuna . . . Oh, ya keke ve na muntu awa?”

172 “Mu zola Muntu yina lenda sala yawu. Mu zola Muntu yina lenda vulusa.”

173 Mpe yandi monikaka ve, na yina Jean dilaka. Oh, nyonso vwandaka ya kuzimbana; mpe yandi dilaka mingi. Mpe yandi—yandi vwandaka na kiadi, samu bima nionso, luvangulu nionso vwandaka me zimbana, kana ba lendaka ve kuzwa muntu mosi. Nkembo na Nzambi! Kana bawu lungaka mona muntu mosi ve yina lendaka zitisa misiku yina, kuna . . . bantu nionso, mpe yinza ya muvimba mpe luvangulu nionso, vwandaka me zimbana. Oh, bima nionso kubwaka. Bamuswa ya mpulusu, bamuswa ya—ya Luzingu ya Kukonda nsuka, Nsemo, bamuswa yayi nionso zimbanaka, mpe ya vwandaka na muntu mosi ve yina lendaka futa ntalu. Mpe Jean bandaka na kudila, samu muntu mosi ve vwandaka ya kulunga, mpe muntu mosi ve lendaka kutala Buku. Oh, ya lombaka muntu mosi. Jean dilaka, samu ti muntu ve lendaka sala yawu, mpe nyonso vwandaka ya kuzimbana.

174 Mpe ndinga mosi katukaka na mosi ya bakuluntu, yina vwandaka ya kutelama na kati-kati ya Bibulu yiya mpe makesa nyonso ya nene ya Mazulu, tubaka, “Kudila ve, Jean.” Oh, la la!

175 Lemvo ya Nzambi!

176 “Kuvwanda ve na mawa na ntima, Jean. Kudila ve. Samu ti Nkosi ya dikanda ya Juda, Nsimbulu mpe Dikanda ya David, Yandi me nunga.”

177 *Kununga* zola kutuba “kunwana na, mpe kununga.” Oh, la la! Disamba ya Gethsémané, ntangu matono ya Menga tiamukaka na kizizi ya Yandi, Yandi vwandaka kununga. Beno me mona? Fiou! Beno me mona?

178 “Nkosi, mpe Nsimbulu ya David, me nunga, me nunga.”

179 Mutindu Jacob, yina vwandaka muyibi. Mpe ntangu yandi kutanaka na Wanzio, yandi simbaka ngwi. Mpe Wanzio mekaka na kukatuka. Yandi tubaka, “Mu—mu ke bika Nge kukwenda ve.” Yandi simbaka ngwi tii kuna yandi kuzwaka yina yandi zolaka. Mpe nkumbu ya yandi sobaka, na *muyibi*, zola tuba “muntu ya luvunu.” Na yinki? Na “ntinu na Nzambi,” *Israel*. Yandi me nunga.

180 Mpe Nkosi yayi ya dikanda ya Juda me nunga. Yandi tubaka, “Kudila ve, Jean. Samu ti Nkosi ya dikanda ya Juda, Nsimbulu ya David, me nunga. Yandi me nunga yimeni. Yandi me sala yawu. Ya kele yimeni, Jean.” Fiou! Oh, oh, la la! Yandi basisaka décolorant yina ke vutula disumu na maboko ya mvindu ya yandi yina . . . na ndwenga ya yandi, tulaka yawu mvindu, muntu. Yinga.

181 Kasi ntangu Jean balukaka samu na kutala, yandi monaka Mwana-dimeme. Yinki luswaswanu na Nkosi! Yandi tubaka, “Nkosi me nunga.” Beno me mona, diaka, mu lenda sadila yawu kuna, Nzambi vwandaka bumbama na kukikulumusa. Yandi tubaka, “Ya kele na Nkosi.” Yina kele ntinu ya bibulu. “Nkosi me nunga.” Kima ya kulutula ngolo kele nkosi.

182 Mu me lalaka na kati ya bamfinda na Afrika, mpe me kuwaka ba-girafe ke boka ngolo. Mpe—mpe nzoko ya nene, ya ngolo, ke banda na kuboka na mupepe, “Wiiit, wiiit, wiiit.” Mpe mu ke kuwa bibulu ya mfinda ke boka, ti ba ke kanga menga ya beno. Mpe ba-scarrabée ke boka, tii . . . Mpe Billy Paul na munu vwandaka ya kulala na mwa kisika mosi ya ntama ya kufika na mwa bintala. Mpe kuwa, kuna na ntama, nkosi mosi ke boka, mpe bima nionso na ntoto ya kuyuma ke kanga yinwa. Ata mpe ba-scarrabée ke bika na kuboka. Ntinu ke na kuzonzaka. Oh, oh, oh, oh, la la!

183 Mu ke tuba na beno, ya kele ntangu ba-denomination mpe bantembe ke kubwaka. Bima nionso ke vwanda kaka swi ntangu Ntinu ke tuba. Mpe *Yayi* kele Ntinu, yina kele Ndinga na Yandi. Oh!

184 Yandi tubaka, “Jean, kuvwanda na boma ve. Kudila ve. Kuvwanda ve na mawa na ntima, Jean. Mu me nata nge awa na vision; mu ke na katalisa nge kima mosi. Mpe mu zaba ti nge ya muvimba na kidi-kidi, samu, beno zaba, ya ke na kima mosi ve fwana kuzwa mpulusu, bima nionso me zimbana; ya kele na

muntu ve yina lendaka zitisa musiku. Kasi Nkosi ya dikanda ya Juda. . .”

185 Beno zaba, Juda. . . Beto me mona yawu, mpe na tablo awa, beno zaba. Dikanda ya Juda, bendele, vwandaka nkosi.

186 Beno bambuka moyo, nkosi, mpe—mpe ngombe, mpe. . . mpe nionso yina, mfumu ya muntu, mpe nionso yina. Mpe bayina vwandaka kengila, ba-Séraphin yina, na zulu ya Ndinga; na yina muvimba ya yawu, Marc, Matthieu, Luc, mpe Jean, nyonso vwandaka zunga pene-pene ya Buku ya Actes.

187 Mpe mu kuwaka muntu kutuba, longi mosi ya nene, kutuba, “Buku ya Actes kele kaka charpente.”

188 Ya vwandaka Vinu ya ntete yina Dibuundu ya santu me basisa. Uh-huh! Yinga, tata. Mpe kana Yandi me basisa mosi yankaka, ya ke vwanda mutindu yina, mpe. Yinga, tata! Beno kele na mwa bayinti ya vinu ba me namika, mpe ba ke na kubutaka. Ya fwana vwanda malala. Kasi. . . Beno me mona? Ntangu Vinu yina—Vinu yina me basisa diaka divala ya Yawu, Ya ke vwanda kaka kieleka mutindu ya kisina.

189 Mpe Matthieu, Marc, Luc, mpe Jean, Bansangu ya mbote yina kele ya kutelama kuna na kukebaka Yawu. Ndwenga ya muntu; ngolo ya nkosi; kisalu ya ngombe; mpe mbangu ya yingo. . . to ya ngononi, mu zolaka tuba. Yinga, Bansangu ya mbote me telama kuna! Yinki? Beno ke bambuka moyo ntangu beto kuzwaka yawu? [Dibuundu me tuba, “Amen.”—Mu.] Ya kele na *Bansungi Sambwadi ya Dibuundu*.

Ntangu yayi yandi tubaka, “Nkosi ya dikanda ya Juda.”

190 Samu na yinki kuna na Juda? “O Juda, muntu ya musiku ke kwenda ve ntama na yawu, na kati-kati ya mabolongo ya yandi, tii kuna Shilo ke kwisa. Kasi Yandi ke basika na Juda.”

191 “Mpe Nkosi, kidimbu ya dikanda ya Juda, me nunga. Yandi me nunga.”

192 Mpe ntangu yandi talaka kuna samu na kumona yina Nkosi vwandaka, yandi monaka Mwana-dimeme. Ya kele ngitukulu, beno ke tala Nkosi mpe beno mona Mwana-dimeme. Kuluntu bokilaka Yandi Nkosi. Kasi ntangu Jean talaka, yandi monaka Mwana-dimeme, “Mwana-dimeme mutindu Yandi kufwaka kubanda mbandukulu ya yinza.” Mwana-dimeme kufwaka. Yinki ya vwandaka? Yinki ya vwandaka Mwana-dimeme yina? Ya vwandaka na menga, ya kulwala. “Mwana-dimeme yina kufwaka, kasi vwandaka moyo dyaka.” Mpe Yandi vwandaka na menga. Oh, la la!

Wapi mutindu beno lenda tala Yawu, bankundi, mpe kubikala nsumuki?

193 Mwana-dimeme belamaka. Kuluntu tubaka, “Nkosi me kununga, Nkosi ya dikanda ya Juda.” Mpe Jean talaka samu na kumona Nkosi, mpe kuna kwizaka Mwana-dimeme, ke tekita,

Menga na zulu ya Yandi, na bamputa. Yandi me nunga. Benolenda tuba ti Yandi vwandaka na bitumba. Yandi kufwaka, kasi Yandi vwandaka zinga diaka.

¹⁹⁴ Jean talaka ve Mwana-dimeme yayi ntete, beno zaba, awa. Ba me zonzila yawu ntete ve. Ya ke na kisika ba me sonikaka Yawu ve. Jean me monaka Yawu ve, bisika nyonso na Mazulu, mutindu yandi vwandaka tala. Kasi awa Yandi yina me kwiza.

¹⁹⁵ Benotala kisika Yawu me katuka. Wapi kisika Yawu me katuka? Ya me katuka na Kiti ya kimfumu ya Tata, kisika ba me kufwa Yandi mpe vumbukaka dyaka. “Yandi me vumbuka mpe me vwanda na diboko ya kibakala ya Nzambi, kele moyo samu na kusambila.” Amen. Yandi me telama kuna, bubu yayi, mutindu Musambidi, na Menga ya Yandi Mosi, samu na kusambila samu na kukondwa kuzaba ya bantu. Ntangu yayi, ya kele yandi yina mu ke tudila ntima. Yandi vwandaka diaka ya kufika na décolorant, décolorant ya pardo ya disumu.

¹⁹⁶ Jean talaka Mwana-dimeme yina, mpe Mwana-dimeme talanaka mutindu Yandi kufwaka. Mpe na manima yandi monaka ti Yandi lwalaka, mpe me zengana, mpe monaka mpasi, mpe menga vwandaka basika. Mwana-dimeme ke basika menga, yawu yina bakaka kisika ya beto. Yawu ke yitukisa ve, Mwana-dimeme lendaka baka kisika ya beto? Mpe yandi monaka Mwana-dimeme. Yandi basikaka.

¹⁹⁷ Jean monaka Yandi ve, samu ti Yandi vwandaka ntama kuna na kati ya Baseko, vwandaka sambila; mpe vwandaka talisa ti bayina kwisaka na Nzambi, na nsi ya dikabu ya menga ya bangombe, ya bankombo, na nsi ya dikabu ya muyingi, Yandi mpe. . . Samu, bayina kwikilaka yawu, vwandaka tala na Yandi. Mpe Menga vwandaka me tiamuka ntete ve, na yina Yandi vwandaka kuna samu na kutalisa bawu pwelele. Yandi vwandaka kuna samu na kukatula kitumbu ya beno mpe munu.

¹⁹⁸ Mpe, O Nzambi, mu banza ti Yandi kele kuna na nkokila yayi. Samu na konso nsumuki, Mwana-dimeme kufwaka. Wapi mutindu Yehowa lendaka mona kima yankaka kasi Mwana-dimeme yina ya menga vwandaka ya kutelama kuna!

¹⁹⁹ Mpe Mwana-dimeme monikaka na vision ntangu yayi, mutindu Yandi vwandaka ya kufwa. Benotala, me katuka na Kiti ya kimfumu ya Tata. Oh, beno banza! Yandi, wapi kisika Yandi katukaka, samu na kukota na vision yayi? Yandi me katuka na Nkembo, kisika Yandi me vwanda na diboko ya kibakala ya Nzambi. Yandi katukaka, na Nkembo, kwisaka na ntwala ya Jean.

²⁰⁰ Oh, ya ke vwanda ve kima ya nkembo kana mabanza ya beto ya masumu, na nkokila yayi, lendaka vwanda na lweka ntama mingi samu na kundima Yandi, mpe Yandi ke belama kubanda kuna na Nkembo, na nkokila yayi, samu na kukikuzabisa Yandi mosi na kati ya beno!

²⁰¹ Mwana-dimeme ke na kwisa na Nkembo, samu na kusambila, mbote mingi, samu na kulomba ntangu yayi mpulusu ya Yandi! Beno bambuka moyo, Yandi vwandaka na kisalu ya muvukisi ya Yandi *awa*. Kasi, beno bambuka moyo, Bidimbu yayi me kubama samu na kuzibuka, mpe Mwana-dimeme me basika na kivinga ya Nzambi, me kwenda na ntwala.

²⁰² Beno vingila tii kuna beto ke kuma kuna, na ngunga yayi, beto ke baka “ngunga mosi na ndambu” ntangu Yawu kele swi. Kivinga kele ya kufuluka na mulinga. Ya kele dyaka ve na lombilu. Munkayulu me kumana. Ya kele Kiti ya Lufundusu. Ya kele dyaka ve na Menga na zulu ya yawu, samu ti Mwana-dimeme ya kufika na Menga me kwenda. Beno vingila ve tii na ntangu yina. Beno ke bambuka moyo na Ngwisani ya Ntama? Ntangu nyonso yina menga vwandaka me katuka na kiti ya kyadi, ya vwandaka lufundusu; kasi ntangu nyonso yina menga vwandaka na zulu kuna, ya vwandaka na kyadi. Kasi ntangu Mwana-dimeme me kwenda, yimeni!

²⁰³ Yinki Yandi vwandaka? Yandi vwandaka Musambidi. Muntu yankaka ve! Beno tuba na munu kisika Marie lendaka sambidila na ntangu yina. Yinki Marie lendaka pesa? Yinki Santu François, Santu Assise, to konso muntu yina, mpe Santu Cecile, mu zolaka tuba, to muntu yankaka ya lendaka vwanda? Jean monaka ata fioti ve mafunda ya basantu kubasika na kisika ya muvukisi. “Yandi monaka Mwana-dimeme, Mwana-dimeme yina kufwaka, na menga.” Mu ke kipe ve lutangu ya basantu yina kufwaka; bawu nyonso vwandaka ya kulunga samu na yawu, mosi na mosi ya bawu. Mutindu muyibi yina tubaka na kulunsi, “Beto me sumuka, mpe beto me lunga samu na yayi. Kasi Muntu yayi me sala kima mosi ve.” Yandi vwandaka Muntu yina vwandaka ya kulunga.

²⁰⁴ Yandi yina ke na kwisa, na kivinga ya kusambidila. Samu na yinki Yandi ke na kwisa ntangu yayi? Beno tala Yandi! Oh, oh, la la!

²⁰⁵ Jean vwandaka dila. Wapi kisika kele bima nyonso—nyonso? Yinki ke salama?

²⁰⁶ Yandi tubaka, “Kudila ve, Jean,” kuluntu tubaka. “Awa me kwiza Nkosi. Yandi vwandaka Yandi yina me nunga.” Ntangu yandi talaka, ya vwandaka Mwana-dimeme kwisaka, na menga, yina me kufwa.

²⁰⁷ Konso kima yina ba me kufwa kele na menga. Beno zaba, ba me kufwa yawu. Nkingu ya yandi kele ya kuzenga, to kima mosi. Menga kele bisika nionso na zulu ya yawu.

²⁰⁸ Mwana-dimeme kwisaka, yina kufwaka. Mpe Yandi me basika, oh, la la, (yinki?) samu na kulomba bamuswa ya Yandi samu na mpulusu ya Yandi. Amen. Oh! Oh! Mu . . . Beno ke na nsatu ve ya kukwenda kuna na nsongi, kuvwanda na nsi mpe kudila mwa ntangu fioti? Mwana-dimeme kwisaka, dyaka na

menga. Jean. . . Ya vwandaka ve na kima kuna; bantu nyonso ya lukumu vwandaka ya kutelama pene-pene, kasi ya vwandaka ve na mosi ya bawu yina zolaka sala yawu. Na yina, awa me kwisa Mwana-dimeme, ntangu yayi. Bilumbu ya Yandi ya kulomba me suka, bilumbu ya muvukisi.

²⁰⁹ Ya kele ntangu Wanzio yayi ke telama kuna. Beno vingila tii beto ke kuma na Bidimbu. “Mpe ntangu ke vwanda dyaka ve.” Ya kele kieleka. Ya kele “minuti makumi tatu ya swi.” Beno tala mbote yina ke salama na minuti makumi tatu ya swi, na ntangu ya Kidimbu ya Sambwadi, na nkokila ya Lumingu ke kwisa, kana Mfumu kuzola.

²¹⁰ Yandi ke kwisa (samu na yinki?) samu na kubaka bamuswa ya Yandi ntangu yayi. Oh, la la! Yandi ke kwisa baka bamuswa ya Yandi! Ntangu yayi, Yandi salaka kosalu ya Tata. Yandi kulumukaka, kumaka Muntu, mpe kufwaka. Yandi salaka kosalu ya Tata samu na mpululu, kasi Yandi vwandaka me lombamba ntete ve muswa ya Yandi. Ntangu yayi Yandi ke kota na kosalu samu na kulomba bamuswa ya Yandi, (beno tala yina ke salama) oh, la la, samu na yina Yandi kufwaka, samu na kukuma Tata ya muntu, samu na kufwa na kisika ya yandi, samu na kuvulusa yandi. Kasi, kuluntu vwandaka ya kusungama ntangu yandi tubaka ti Yandi vwandaka “Nkosi,” beno me mona. Kuluntu bokilaka Yandi, yandi tubaka, “Nkosi.” Samu ti, Yandi vwandaka Mwana-dimeme, Musambidi, Mwana-dimeme ya menga, kasi ntangu yayi Yandi ke na kwisa mutindu Nkosi. Bilumbu ya Yandi ya kulomba me suka.

²¹¹ “Bika ti yandi yina kele mvindu yandi vwanda diaka mvindu. Bika ti yandi yina kele ya kusungama yandi kuvwanda diaka ya kusungama. Bika ti yandi yina kele ya santu kuvwanda dyaka ya santu.” Kima kele ya kukanga. Oh, mpangi! Yinki na manima? Yinki na manima?

²¹² Mpe, beno bambuka moyo, ya ke kwisa na nsungi ya dibuundu ya sambwadi, ntangu mansweki ya Nzambi ke zibuka. Ntangu yayi beno tala mbote. Yayi kele kima yina beno fwana simba. Ntangu yayi, Yandi vwandaka sala kosalu ya Yandi ya muvukisi, samu na kulombila mukwikidi. Na bamvula mafunda zole Yandi vwandaka kuna, Mwana-dimeme. Ntangu yayi Yandi ke na kwisa na Seko, samu na kubaka Buku yina kele na muswa ya munkwa-kima, mpe samu na kubuka Bidimbu, mpe kumonisa mansweki. Wapi ntangu? Na ntangu ya nsuka.

²¹³ Beno me bakula yawu? [Dibuundu me tuba, “Amen.”—Mu.] Mbote mingi, beto ke landila kuna.

²¹⁴ Ntangu yayi, kubuka Bidimbu mpe kubasisa mansweki nionso na bawu, na wanzio ya sambwadi, yina kele na Nsangu ya kumonisa mansweki nionso ya Nzambi. Mansweki ya Nzambi kele na kati ya Bidimbu Sambwadi yayi. Beno me mona? Ya

kele yina Yandi tubaka awa. Mansweki nyonso kele na kati ya Bidimbu Sambwadi yayi.

²¹⁵ Mpe Mwana-dimeme ke basika ntangu yayi, na kuvwandaka Muvukisi na kati-kati ya Nzambi na muntu. Yandi ke kuma Nkosi. Mpe ntangu Yandi ke kuma Nkosi, Yandi ke baka Buku. Yina ke bamuswa ya Yandi. Nzambi me simba Yawu, mansweki, kasi ntangu yayi Mwana-dimeme me kwisa.

²¹⁶ Muntu ve lenda baka Buku. Ya kele dyaka na maboko ya Nzambi. Pape mosi ve, nganga-Nzambi, nionso yina lendaka vwanda, ba lenda baka ve (ve) Buku. Bidimbu Sambwadi me monisama ntete ve. Beno me mona?

²¹⁷ Kasi ntangu, Muvukisi, ntangu kisalu ya Yandi ke suka mutindu Musambidi, Yandi ke kwisa. Mpe Jean . . . Kuluntu tubaka, “Yandi kele Nkosi.” Mpe Yandi ke na kwiza. Beno tala Yandi mbote. Oh, la la! Beno me mona? Yandi ke kwisa samu na kubaka Buku, ntangu yayi beno tala mbote, samu na kutalisa mansweki ya Nzambi, yina bayankaka vwandaka na mabanza, na kati ya bansungi yayi ya denomination.

²¹⁸ Beno me mona, kuna, wanzio ya sambwadi. Kana Buku yayi, mansweki, kele Ndinga ya Nzambi, wanzio ya sambwadi fwana vwanda profete, samu ti Ndinga ya Nzambi ke kwizaka na yandi. Banganga-Nzambi ve, pape ve, to kima yankaka ve, lenda baka Yawu; Ndinga ke kwizaka ve na kima mutindu yina. Ndinga ya Nzambi ke kwizaka kaka na profete, ntangu nyonso. Malachie 4 silaka yawu. Mpe ntangu yandi ke kwisa, yandi ke baka mansweki ya Nzambi, kasi dibuundu ke vwanda na kati ya muvusu na kati ya ba-denomination nionso yayi, “Mpe kuvutula Lukwikilu ya bana na batata.” Mpe na yina lufundusu ya yinza ke bula, mpe ntoto ke yokama na tiya. Mpe kuna bantu ya mbote ke tambula na zulu ya mbombi ya bantu ya yimbi, na Millénium.

²¹⁹ Beno me bakula yawu ntangu yayi? [Dibuundu me tuba, “Amen.”—Mu.] Mbote mingi.

²²⁰ Bayankaka vwandaka na mabanza, na kati ya nsungi ya denomination. Kasi, beno me mona, yandi fwana vwanda muntu yayi, wanzio ya sambwadi ya . . . Apocalypse 10:1-4 kele . . . Wanzio ya sambwadi kele na mansweki ya Nzambi ba me pesa yandi, mpe ke sukisa mansweki nionso yina me bikana, na kati ya bansungi ya denomination.

²²¹ Ntangu yayi beno lenda mona samu na yinki mu ke nganinaka ve bampangi ya munu na ba-denomination. Ya kele systeme ya denomination! Bawu kele ve, ya kele ve na nsatu ti bawu kumeka na kuzaba Yawu, samu ti Yawu lenda monisama ve. Ya kele landila Ndinga. Bawu banzaka na Yawu, mpe kwikilaka ti Yawu vwandaka kuna, mpe na lukwikilu tambulaka na Yawu, kasi ntangu yayi Yawu me talisama pwelele. Amen. Oh, la la, wapi—wapi Masonuku!

222 Ntangu yayi beno tala mbote. Na yina ya kele Yandi, Mwana-dimeme, yina ke baka kisika ya Yandi ya Ntinu, ntangu basantu ya Yandi ke kwisa samu na kubyadisa Yandi, “Mfumu ya mfumu, mpe Ntinu ya bantinu.” Beno me mona?

223 Beno me mona, “Ntangu me luta.” Apocalypse 10:6, “Ya kele dyaka ve na ntangu.”

224 Beno tala, ya kele “bibongo sambwadi” na zulu ya Mwana-dimeme yayi. Beno me bakula yawu? “Yandi vwandaka na bibongo sambwadi.” Beto me mona yawu. *Bibongo* zola kutuba “ngolo,” samu na kibulu. Mpe, beno tala, Yandi vwandaka ve kibulu, samu ti Yandi bakaka Buku na diboko ya kibakala ya Yandi yina vwandaka na zulu ya Kiti ya kimfumu. Beno me mona? Beno tala. Oh, la la!

225 Mu banza ti mu sonikaka yawu kisika mosi; oh, samu na kubuka Bidimbu, mpe kuzibula muswa, muswa ya munkwakima, mpe Nsangu ya wanzio ya nsuka. Mpe Yandi ke bakaka kisika ya Yandi ya Ntinu. Yawu yina Yandi ke kwisa sala na ntangu yayi.

Ntangu yayi beno tala mbote, ntangu Yandi ke basika, “Bibongo sambwadi.”

226 Ntangu yayi, ntangu yandi monaka Mwana-dimeme yayi, Jean talaka Yandi, Yandi—Yandi monanaka mutindu Yandi vwandaka ya kufwa, ke na kubasika menga. Mpe Yandi me katuka na Seko, mpe Yandi ke sukisa na kuvwanda Muvukisi.

227 Na yina beno sambila Marie mutindu beno zola! “Ya vwandaka ve na muntu na Mazulu, mpe na ntoto, to muntu mosi ve, yina vwandaka ve na muntu kisika yankaka, yina lendaka baka yawu.” Jean dilaka samu na yawu. Oh, nkundi ya munu ya Catholique, beno lenda mona yawu ve? Beno sambila ve muntu ya kufwa.

228 Mwana-dimeme kele Muvukisi mosi kaka. Beno me mona? Yandi vwandaka Yina vwandaka landa. Mpe yinki Yandi salaka ntangu yayi? Yandi me vwanda awa samu na kulomba, tii kuna Menga ya Yandi ke katula masumu samu na muntu nyonso. Mpe Mwana-dimeme, ntangu yayi, zaba yina kele ya kusonika na kati ya Buku. Na yawu, Yandi zabaka na mbandukulu ya yina bankumbu ya bawu vwandaka na kati Kuna, na yina Yandi vwandaka na manima awa mpe ku-. . . mpe—mpe, kasi, Muvukisi salaka mutindu yayi tii. . . kisalu ya muvukisi, tii konso muntu yina ba me tula na kati ya Buku ke vuluka, mpe ya me suka. Mpe ntangu yayi Yandi ke basika. Beno me mona? Yandi me sala kisalu ya Tata ya Yandi. Yandi kele nionso. . . Beno zaba yina kisalu ya Tata vwandaka? Samu na kupesa kimbangi na ntwala ya bakuluntu. Beno ke bambuka moyo na Boaz yina katulaka sapatu ya yandi, mpe nyonso yina? Yandi me sala nyonso yayi ntangu yayi.

229 Ntangu yayi Yandi ke kwisa samu na kubaka Kento ya Yandi ya makwela. Amen. Yandi ke kwisa ntangu yayi mutindu Ntinu. Yandi ke na kuingila Ntinu-kento ya Yandi. Amen. Amen. Na kati ya Buku yayi kele kinsweki ya Yawu nionso, yina me bumbama, na Bidimbu Sambwadi. Oh, mpangi! Bidimbu Sambwadi, ke vingila Yandi kukwisa. Beno tala.

230 Beto baka bidimbu yayi. Mbote, ya kele kaka ngunga ya yivwa. Beto kele na bangunga tatu to kulutila, samu na kukwenda. Beto fwana . . . beto fwana kaka . . . Satana ke landila kaka na kutuba na munu ti bantu me lembe, na yina mu banza ti ya ke mutindu yina. Kasi beto—beto baka yayi, na mutindu nyonso.

231 “Bibongo sambwadi” vwandaka mabuundu sambwadi, beno me mona, bansungi sambwadi ya dibuundu, samu ti yina vwandaka lukengolo ya Mwana-dimeme. Na yina Yandi vwandaka keba bamuswa ya Yandi, na zulu ya ntoto, ya vwandaka Kimvuka ya bantu yina Nzambi tindaka; beno me mona, bibongo ya Mwana-dimeme.

232 “Meso sambwadi” kele minati-nsangu sambwadi ya bansungi sambwadi ya dibuundu. “Meso sambwadi,” mimoni sambwadi.

233 Beno zola sonika mwa Masonuku? Beto baka yawu. Yinki beno ke tuba, beno ke na ntangu? [Dibuundu me tuba, “Amen.”—Mu.] Mbote mingi. Beto kwenda na Zacharie, Buku ya—ya Zacharie, kaka mwa fyoti, mpe beto ke—beto ke tanga ndambu ya yayi.

234 Mu—mu zola ve kubumba beno ntangu mingi na zulu ya bima yayi. Mpe—mpe mu . . . Kasi, ntete, mu zola ve ti beno zimbana yawu. Yinki kele mfunu mingi kulutila yayi? Yinga. Yinki diaka . . . [Mpangi-bakala mosi me tuba, “Mpangi Branham?”—Mu.] Yinki? [“Ba lendaka kuteza yawu ve.”] Kima mosi ve kele mfunu mingi kulutila Lizingu ya Kukonda nsuka samu na muntu mosi. Mpe beto fwana—beto fwana bakula yayi ntangu yayi, mpe—mpe kundima ti beto me bakula yawu. Mbote mingi. Mbote mingi, tata.

235 Mpe ntangu yayi beto zola kutanga Zacharie kapu ya 3. Mu banza ti yawu yina, ntangu yayi, Zacharie 3. Beto ke baka bidimbu yayi awa, kana mu me sonika Masonuku. Mu vwanda boka bisika nyonso, na manima ya midi yayi, ntangu mu monaka yayi. Na yina mu—mu zaba ve kana mu me sonika yawu mbote, to ve. Mu banza ti mu me sonika yawu mbote. Zacharie 3, beto tala kana ya kele . . . mu ke na 89 awa, kasi ya fwana vwanda 8 na 9. Mbote mingi. Mbote mingi. Mu zaba ti ya lenda vwanda ve 89. Zacharie 3:8 mpe 9.

Kuwa ntangu yayi, O Josué nganga-Nzambi ya mbuta, nge, mpe bantu ya nge yina me vwanda na nge: samu

bawu kele bantu yina ke vwanda bidimbu: samu, tala, mu ke basisa kisadi ya munu DIVALA (Klisto).

Na yina tala ditadi yina mu ke tula na ntwala ya Josué; na zulu (ditadi) ditadi mosi ke vwanda meso sambwadi: (meso sambwadi), tala, mu ke sonika yina ba fwana sonika kuna, me tuba MFUMU ya makesa, . . . Mu ke katula disumu ya nkú ya yinsi na kilumbu mosi.

236 Ntangu yayi beto baka Zacharie 4:10, 4:10. Beno kuwa.

. . . yina vwandaka vweza kilumbu ya mbandukulu ya bima ya fyoti (Nzambi na kati ya kukikulumusa, beno me mona)? ba ke sepela, mpe. . . na kumonaka kitezo na maboko ya Zorobabel na bayina. . . na bayina sambwadi; yayi kele meso ya MFUMU, yina ke tambula bisika nyonso na ntoto ya muvimba.

237 “Meso sambwadi.” Meso zola kutuba “kumona.” Kumona zola kutuba “baprofete, mimoni.” Mwana-dimeme yayi vwandaka na bibongo sambwadi, mpe konso bibongo vwandaka na disu, “meso sambwadi.” Yinki ya kele? Klisto na Kento ya Yandi ya makwela; bansungi sambwadi ya dibuundu. Baprofete sambwadi basikaka kuna, mimoni sambwadi, meso. Na yawu, yina ya nsuka fwana vwanda mumoni. Mbote mingi.

238 Beno tala, Yandi kele ve kibulu. “Yandi bakaka Buku na diboko ya kibakala ya Yandi yina vwandaka na zulu ya Kiti ya kimfumu.” Nani Yawu vwandaka? Munkwa-kima, Munkwa-kima ya kisina, yina vwandaka na Buku ya Mpulusu na diboko ya Yandi ya kibakala. Mpe Wanzio mosi ve, Kivangu ya Wanzio ve, kima yankaka ve, lendaka baka kisika. “Mpe Mwana-dimeme yayi kwendaka mpe bakaka Buku na diboko ya Yandi.” Fiou! Yinki ya vwandaka? Mpangi-bakala, yayi kele kima ya kulutula kitoko na Masonuku. Kisalu yina Wanzio mosi ve, kima mosi ve, lendaka sala yawu. “Mpe Mwana-dimeme kwizaka mpe bakaka Yawu na diboko ya kibakala ya Yandi yina vwandaka ya kuvwanda na zulu ya Kiti ya kimfumu.”

239 Yinki ya kele? Ntangu yayi Yawu kele ya Mwana-dimeme. Amen. Misiku ya Nzambi me lombu. Yandi kele Yandi yina me simba Yawu. Musiku ya Nzambi lombaka Tata Mukudi. Mpe Mwana-dimeme basikaka, simbaka Yawu, “Mu kele Tata ya bawu. Mu kele Mukudi ya bawu. Mu ntangu yayi. . . Mu me lombu samu na bawu, mpe ntangu yayi mu me kwisa samu na kulomba bamuswa ya bawu.” Amen. Kele na Mosi kaka. “Mu me kwisa samu na kulomba bamuswa ya bawu. Na yina, bawu kele na muswa ya bima nionso yina me zimbana na kubwa, mpe mu me futa ntalu.”

240 Oh, mpangi! Fiou! Yina ke sala beno ve kuwa musambidi na kati? “Ve na nzila ya bisalu ya mbote yina beto me sala, kasi na nzila ya kyadi ya Yandi.”

²⁴¹ Oh, beno vingila fioti! Mpe tala bakuluntu yayi mpe nyonso yankaka me banda na kukatula bayimpu ya bawu, mpe bantu ya lukumu me banda na kufukimina, beno me mona.

Muntu mosi ve, muntu mosi ve lenda sala yawu.

²⁴² Mpe Yandi me kwisa mbala mosi na diboko ya kibakala ya Nzambi, mpe me baka Buku na diboko ya Yandi, mpe me lomba bamuswa ya Yandi. “Mu me kufwa samu na bawu. Mu kele Tata Mukudi ya bawu. Mu kele. Mu kele Muvukisi. Menga ya Munu tiamukaka. Mu me kuma Muntu. Mpe mu salaka yayi samu na kuvutula Dibuundu yina diaka, Yina mu monaka na ntswala ya mbandukulu ya yinza. Mu kanaka Yawu. Mu zonzaka Yawu, Ya ke vwanda kuna. Mpe muntu mosi ve vwandaka na lenda ya kubaka Yawu, kasi Mu kulumukaka mpe salaka yawu, Munu mosi. Mu kele Tata ya bawu. Mu me kuma musumbi.” Mpe Yandi me baka Buku. Amen!

²⁴³ Oh, Nani ke na kuingila Kuna samu na munu na nkokila yayi? Nani kele Muntu yina, dibuundu, yina ke na kuingila Kuna? Nani yankaka lenda vingila Kuna samu na beno? Ya kele Tata Mukudi! Oh, la la! Yinki nsamunu yayi ya kitoko, to kusalu!

²⁴⁴ Ntangu yayi Yandi kele na muswa ya munkwa-kima samu na mpulusu. Yandi kele na Yawu na diboko ya Yandi. Kuvukisa me mana ntangu yayi. Yandi ke na Yawu na diboko ya Yandi. Beno bambuka moyo, Yawu vwandaka na diboko ya Nzambi, ntangu nionso, kasi ntangu yayi Yawu ke na diboko ya Mwana-dimeme. Ntangu yayi beno tala mbote. Muswa ya munkwa-kima samu na mpulusu, ya luvangulu nyonso, kele na diboko ya Yandi. Mpe Yandi me kwisa samu na kulomba Yawu, diaka, samu na dikanda ya bantu. Kele ve yina ke tubaka ti Yawu me vutuka na Bawanzio. Yandi tubaka ti Yawu me vutuka na bantu, yina Yawu pesamaka, samu na bana-babakala mpe bana-bakento ya Nzambi diaka; ke vutula bawu na disamba ya Eden, nyonso bawu zimbisaka; luvangulu nionso, bayinti, luzingu ya baniamama, bima nionso yankaka. Oh, la la!

²⁴⁵ Yina ke sala beno mbote ve? Fiou! Mu banzaka ti mu me lembe, kasi mu me lembe ve ntangu yayi. Beno me mona? Bantangu yankaka mu banza ti mu me kuma—mu me kuma mbuta mingi samu na kulonga, mpe na yina mu ke kwenda na kumona kima mutindu yina, mpe mu banza ti mu ke diaka ntwenia ya bakala. Yinga. Uh-huh. Hum! Ya ke sala kima mosi na beno. Beno me mona?

²⁴⁶ Samu mu zaba yayi, ti ya kele na Muntu Kuna yina ke na kuingila munu. Kele na Muntu mosi futaka ntalu yina mu lendaka futa ve. Ya kieleka. Yandi salaka yawu samu na munu, Charlie. Yandi salaka yawu samu na beno. Yandi salaka yawu samu na bantu nionso. Mpe ntangu yayi Yandi ke kwisa samu na kulomba bamuswa ya Yandi ya mpulusu. Ya ke lomba yawu samu na nani? Samu na Yandi mosi ve; samu na beto. Yandi

kele mosi ya beto. Yandi kele mpangi ya beto. Oh, la la! Yandi kele Mpangi ya munu. Yandi kele Mvulusi ya munu. Yandi kele Nzambi ya munu. Yandi kele Tata Mukudi ya munu. Yandi kele nionso. Yinki mu vwandaka kukondwa Yandi, to yinki mu ke vwanda kukondwa Yandi? Na yina, beno me mona, Yandi kele Nionso ya munu. Mpe Yandi kele ya kutelama Kuna mutindu mpangi ya beto. Mpe ntangu yayi Yandi ke na kusambilaka samu na beto, tii na ntangu yayi. Mpe ntangu yayi Yandi ke kwisa mpe ke baka Buku ya Mpulusu, samu na kulomba bamuswa ya Yandi, yina Yandi salaka samu na beto.

²⁴⁷ Ba ke kufwa. Yesu tubaka, “Yandi yina ke kwikila na Munu, ata ti yandi me kufwa, kasi yandi ke zinga. Yina nionso ke zinga mpe ke kwikila na Munu ke kufwa ata fioti ve. Yandi yina ke kudya nzutu ya Munu mpe ke kunwa Menga ya Munu kele na Luzingu ya kukonda nsuka, mpe Mu ke vumbula yandi na kilumbu ya nsuka.”

²⁴⁸ Ata ti, yandi ke lalaka na kuvumbuka ya ntete, ya zole, ya tatu, ya yiya, ya tanu, ya sambanu, to ya sambwadi, konso kisika yina yandi ke lala. Yinki ke salama? Mpungi ya Nzambi ke bula. Mpungi yina ya nsuka ke bula, na ntangu mosi ti wanzio ya nsuka ke pesa Nsangu ya yandi mpe Kidimbu ya nsuka me zibuka. Mpungi yina ya nsuka ke wakana, mpe Mukudi ke basika samu na kubaka bima yina Yandi vulusaka, Dibundu ya Yandi, yina Menga me sukula.

²⁴⁹ Ntangu yayi, oh, luvangulu nyonso me vwanda na diboko ya Yandi ntangu yayi, na yina manaka nionso ya mpulusu kele ya kukanga na Bidimbu sambwadi ya mansweki, na kati ya Buku yayi yina Yandi bakaka. Ntangu yayi beno tala mbote. “Mpe Yandi lenda kaka kumonikisa Yawu na muntu yina Yandi zola.” Yandi kele na Yawu na diboko ya Yandi, beno me mona. Ntangu yayi, Yandi silaka ti ya ke vwanda na ntangu yina, ntangu yayi, samu ti Yawu kele ya kukanga na Bidimbu Sambwadi ya mansweki, Buku ya Mpulusu. Ntangu yayi beno tala mbote. Na yina . . .

²⁵⁰ Bankundi, mu tubaka na beno, mu ke bika beno na ngunga nana na ndambu, kasi mu me tula na lweka ba-page tatu to yiya awa, samu na kukuma na yayi. Na yawu mu zola . . . Mu kele yimeni na manima ya ngunga ya yivwa. Na yawu beno lenda vutuka mbasi.

²⁵¹ Kasi ntangu yayi na kati ya Buku yayi ya Bidimbu sambwadi, ya mpulusu, yina Mwana-dimeme bakaka, na Yandi mosi, vwandaka Yandi Yina kaka lendaka sala yawu. Mpe Yandi bakaka Yawu na diboko ya Yandi ya kibakala ya yina vwandaka na Kiti ya kimfumu, ntangu yayi, samu na kulomba mpulusu ya Yandi, samu na kulomba bamuswa ya Yandi. Samu na kulomba, samu na munu mpe beno, yina Yandi vulusaka beto, na, beno me

mona, na manima na nionso yina Adam zimbisaka na disamba ya Eden. Yandi me vulusa beto kuna na yawu.

²⁵² Ntangu yayi na Mwana-dimeme, na Buku na maboko ya Yandi, beto me kubama samu na kulomba lemvo ya Yandi mpe mawa ya beto na zulu ya beto, samu na kuzibula Buku ya Bidimbu Sambwadi samu na beto, mpe beto kubika beto kutala na simu yina ya rido ya ntangu, mwa fioti. Oh, la la! Beno tala ntangu Yandi bakaka Buku, muswa ya munkwa-kima, ya kukanga, (beno simba yawu kaka na mabanza ya beno ntangu yayi), mpe bukaka Bidimbu ya mansweki, samu na kutalisa yawu, samu na kunata yawu na bantu ya Yandi, beno me mona, na bantu ya Yandi nionso yina ba me vulusa.

²⁵³ Ntangu yayi, ntangu beto ke kuma na yayi na Bidimbu, beto ke vutuka kuna mpe ke mona mioyo yina kele na nsi ya autel, ke dila, “Mfumu, wapi ntangu, wapi ntangu?”

²⁵⁴ Mpe awa Yandi kele mutindu Muvukisi, na zulu ya autel, “Kaka mwa ntangu mingi, tii bayankaka dyaka ke mona mpasi mutindu beno.”

²⁵⁵ Kasi ntangu yayi Yandi me katuka awa, na Kidimbu yayi ya nsuka. Yandi kele dyaka ve Muvukisi. Yandi kele Ntinu ntangu yayi. Mpe yinki Yandi ke sala? Kana Yandi kele Ntinu, Yandi fwana kuzwa bantu. Mpe bantu ya Yandi kele yawu yina Yandi me vulusa, mpe bawu lenda kwisa ve na ntwala ya Yandi tii kuna Yandi ke baka bamuswa ya mpulusu. Mpe ntangu yayi Yandi ke kwisa, na Muvukisi; kisika lufwa tulaka beto na ntoni, Yandi ke kwisa na bamuswa. Amen.

²⁵⁶ “Mpe bayina kele ya moyo mpe ke bikala tii na Nkwizulu ya Yandi, ke pekisa bawu ve bayina kele ya kulala. Samu mpungi ya Nzambi ke bula, na mpungi yina ya nsuka.” Ntangu Kidimbu ya nsuka me zibuka, mpe ntangu wanzio ya sambwadi ke pesa Nsangu ya yandi, “Mpungi ya nsuka ke bula, mpe bayina kufwaka kati na Klisto ke vumbuka na lufwa. Mpe beto yina ke vwanda ya moyo mpe ke bikana beto ke vwanda kintwadi na bawu, samu na kukutana na Yandi na mazulu.” Yandi ke lomba! Yandi ke basika ntangu yayi samu na kulomba kima ya Yandi—ya Yandi.

²⁵⁷ Beno tala mbote! Beno tala yayi! Oh! Bidimbu me zibuka, me monisa pwelele mansweki. Yandi me monisa yawu (wapi?) na nsungi ya nsuka ya dibuundu, mosi yina kaka ke na kuzinga. Bayina nionso kele ya kulala.

²⁵⁸ Yandi tubaka, “Kana Yandi kwisa na kuvumbuka ya ntete, kuvumbuka ya zole, kuvumbuka ya tatu, landila tii na kuvumbuka ya sambwadi.” Na kuvumbuka ya sambwadi, lutumu mosi wakanaka, to lubokilu mosi, “Tala, Bakala ya makwela me kwisa!”

²⁵⁹ Mpe na ntangu bawu salaka yawu, mwense ya kulala, mabuundu ya nkumbu, tubaka, “Oh, beno zaba, mu—mu ke

kwikila ti mu fwana kuzwa Mpeve-Santu yina.” Beno me mona ba-Presbytérien mpe Bapisekopo? Beno me kuwa Nsangu ya munu na Phoenix, samu na bantu yina ke telamaka kuna na estrade, na *Voice* mpe kuna, ke tuba . . . ? Mbote, wapi dyambu na mfumu yayi, na kutubaka, “Tata ya Santu *Kingandi*”? Ntangu, Biblia ke tuba, “Beno bokila muntu mosi ve, ‘Tata,’ mutindu yina.” Beno me mona, bawu kele ya kulala na bawu, ya kele samu na yina, kasi ntangu bawu ke basika mpe ke tuba, “Yinga, beto ke kwikila.”

²⁶⁰ Kento mosi me bokila kento yankaka na allo-allo, yandi tubaka, “Nge zaba, mu kele Muntu ya Mupisekopo.” Yandi tubaka, “Mu—mu—mu tubaka na bandinga, kilumbu yina. Mu ke kwikila ti mu me kuzwa Mpeve-Santu, kasi, shiit, kutuba na muntu ve.” Mu ke tula ntembe mingi na yawu. Beno lendaka zonza na bandinga. Kasi, beno tula muntu na zulu ya Tiya, wapi mutindu yandi ke vwanda swi? Ya kele kieleka. Beno me mona? Beno me mona? Beno lenda ve kusala yawu.

²⁶¹ Beno lenda banza na Pierre, mpe Jacques, mpe Jean, mpe bayankaka na zulu kuna na kivinga ya zulu, na kutubaka, “Oh, beto kele na Mpeve-Santu ntangu yayi, kasi mu banza ti kulutila mbote beto vwanda swi”? Mpangi-bakala, na banela, na bielo, mpe nionso yina, bawu kwendaka, kuna na bala-bala, bawu vwandaka sala mutindu nkonga ya bantu ya kulawuka malafu. Yina kele Mpeve-Santu ya kieleka.

²⁶² Kasi, beno me mona, mwense yina ya kulala kuzwaka kima ve, na mutindu nyonso. Uh-huh. Ya kele kieleka. Mpe beno bambuka moyo, na ntangu bawu kwendaka samu na kusumba Mafuta, beno bambuka moyo, Masonuku ke tuba ve ti bawu kuzwaka Yawu.

²⁶³ Kasi na ntangu bawu kwendaka meka na kusumba Yawu, makelele wakanaka. Yinki salamaka? Bamwense yina nionso vwandaka ya kulala, bawu telemaka mpe yidikaka minda ya bawu, “mpe bawu kwendaka na Madia ya nkokila.” Ya kieleka?

²⁶⁴ Mpe bayina bikalaka samu na ntangu ya Lukwamusu, ya kieleka, “Kudila, manyongo, mpe nkwetisa meno.” Ya kele dibuundu, Kento ya makwela ve; dibuundu.

²⁶⁵ Kento ya makwela me kwenda. Ya kele na luswaswanu ya kieleka kati-kati ya dibuundu na Kento ya makwela. Yinga, tata! Uh-huh. “Yandi kwendaka na Madia ya Makwela.” Oh, beno tala, oh, la la!

²⁶⁶ Bidimbu zibukaka (samu na yinki?) na nsungi ya nsuka ya dibuundu, samu na kutalisa Bakieleka yayi. Samu na yinki? Mwana-dimeme bukaka Bidimbu mpe monisaka yawu na Dibundu ya Yandi, samu na kuvukisa bantu ya Yandi samu na Kimfumu ya Yandi. Kento ya Yandi ya makwela, beno me mona! Oh, la la! Yandi zola kunata bantu ya Yandi na Yandi ntangu yayi.

267 Yinki ya kele? Na kati ya fundu-fundu ya ntoto, kuna na yisi ya mubu, na mabulu, konso kisika mpe bisika nionso, kuna na—kuna na bizunga ya mudidi, kuna na paradiso, kisika nionso ba lendaka vwanda. Yandi ke bokila, mpe bawu ke pesa mvutu. Amen! Amen! Yandi ke bokila, mpe bawu ke pesa mvutu.

268 Yandi me kwisa samu na kubaka bantu ya Yandi. Yandi monisaka mansweki ya Yandi, mpe bawu monaka Yawu. “Mpe ntangu kele diaka ve,” na ntangu yina. “Ntangu me mana.” Ya me suka. Mbote mingi.

269 Yandi ke bika Kiti ya kimfumu, samu na kuvwanda Musambidi, mutindu Mwana-dimeme yina kufwaka; samu na kuvwanda Nkosi, Ntinu; samu na kunata yinza na Lufundusu, yina mangaka Nsangu ya Yandi. Yandi kele ve Muvukisi.

270 Beno bambuka moyo na malongi ya Ngwisani ya Ntama ntangu yayi, na yina beto ke sala nswalu. Ntangu menga vwandaka dyaka ve na kiti ya kyadi, yinki ya vwandaka? Kiti ya lufundusu.

271 Mpe ntangu Mwana-dimeme, yina kufwaka, katukaka na Seko, na Kiti ya kimfumu ya Tata, mpe bakaka bamuswa ya Yandi, yawu vwandaka Kiti ya Lufundusu. Na yina Yandi kumaka, Mwana-dimeme ve, kasi Nkosi, Ntinu, mpe Yandi ke bokila Ntinu-kento ya Yandi ya makwela na kwisa telama pene-pene ya Yandi.

272 “Beno zaba ve ti basantu ke fundisa ntoto?” Daniel me tuba, “Lufundusu vwandaka, mpe babuku zibukaka; mpe makumi ya mafunda na makumi ya mafunda ya mafunda vwandaka sadila Yandi,” Ntinu na Ntinu-kento. “Mpe na yina Buku yankaka zibukaka, yina vwandaka Buku ya Luzingu,” yina kele samu na dibuundu. Mpe Ntinu-kento mpe Ntinu me telama kuna.

273 Mutindu dilongi ya cowboy me tuba:

Mazono na nkokila mu vwandaka ya
kutandama na nseke,
Mu vwandaka tala bambwetete ya mazulu,
Mpe mu vwandaka kukiyufula kana cowboy
Lendaka kwenda na simu yina kuna ya kitoko.

Ya ke na nzila yina ke nata na Kizunga yina ya
nsemo, mpe ya kiese,
Kasi ba ke tubaka ti, ya kele mudidi, mwa nzila
ya fioti,
Kasi bala-bala ya nene yina ke nataka na
kuzimbana
Ya kele ya kuteza mbote mpe ya kuyidika tii na
nsuka.

Bawu ke tubilaka Munkwa-kima yankaka ya
nene,

274 Yandi ke na kutuba na bandinga ya mukengi ya bitwisi. Kana beno me monaka ntete kisika ba ke vukisa bitwisi, beno lendaka mona yawu pwelele.

Bawu ke tubilaka Munkwa-kima yankaka ya nene,
 Mpe Yandi kele ve na bitwisi mingi, mutindu ba ke tubaka,
 Yandi ke vwanda ntangu nyonso na kisika samu na nsumuki
 Yina me kubama na kukwenda na nzila yina ya fioti, mpe ya kukangama.

Ba ke tuba ti Yandi ke bika beno ata fioti ve,
 Mpe Yandi zaba konso kisalu mpe konso ntadilu;
 Na yina, samu na kuvwanda na lukengolo, beto baka kidimbu na kisengo ya Yandi,
 Na bankumbu ya beto ya kusonika na Buku ya Yandi ya nene.

Samu ti ba ke tuba ti ya ke vwanda na kuvukana mosi ya nene,
 Ntangu ba cow-boy ke telama kuna mutindu bana ya bangombe kukondwa mama,
 Samu na kubaka kidimbu na minati-mpunda samu na lufundusu, (Baprofete yayi mpe mimoni yayi.)
 Yina me telama kuna mpe zaba konso kidimbu.

275 Kana beno me monaka ntete kisika ba ke vukisa bitwisi, beno me monaka patron me telama kuna, mpe minati-mpunda, ke tambula na kati ya kimvuka ya bitwisi yina ke na kutambula. Ntangu yandi ke mona kidimbu ya yandi ke luta, mpe yandi ke sala kidimbu na patron. Mpe patron ke mona yawu, mpe ke pesa yandi mvutu na kuningisaka yintu. Mwa mpunda ya yandi ya fioti ke belama na nswalu nionso, pene-pene, ke baluka pene-pene ya bibongo yayi ya nkufi, mutindu yayi, mpe yandi ke basisa baniamya ya yandi. Beno me mona?

Ba ke tuba ti ya ke vwanda na kuvukana mosi ya nene,
 Mpe ba cow-boy ke telama kuna mutindu bana ya bangombe kukondwa mama,
 Ba ke baka kidimbu na minati-mpunda samu na lufundusu,
 Yina me telama kuna mpe zaba konso kidimbu.
 (Beno me mona?)

276 Na yina yandi tubaka:

Mu banza ti mu ke vwanda kibulu ya ntwenia yina me zimbana,

Kaka muntu yina ba me fundisa na kufwa, yina ba me tula kidimbu ve, yandi, yandi kele na kati ya bayina ke salaka soupe, beno me mona.

Yina ba ke zenga na kati ya nkonga ya miyibi
ya bitwisi,
Ntangu Patron ya minati-nsangu yina ke
kwisa.

277 Beno me mona Nani Ya kele? “Patron ya minati-mpunda.” Yina kele Mwana-dimeme, samu na minati-nsangu sambwadi yina kele ya kutelama kuna mpe yina me zaba konso kidimbu. Beno me mona? Hum!

278 Beno tala, Yandi yina me kwiza. Yandi ke bika Kiti ya kimfumu, mutindu Musambidi, mutindu Mwana-dimeme yina kufwaka; samu na kukuma Nkosi, Ntinu, samu na kunata yinza ya muvimba na Lufundusu, yina ba me losa. Tata Mukudi ya beto kele Ntinu na zulu ya nionso. Samu na yinki? Yandi kele munkwa-kima ya mpulusu. Nyonso kele na kati ya diboko ya Yandi. Mu kele na kyese ti mu zaba Yandi. Beno me mona?

279 Na yina Yandi ke lomba difwa ya Yandi; ya kele Dibuundu, Kento ya makwela. Yandi ke lomba Yawu.

280 Yinki Yandi ke sala na manima? Yandi ke kwenda ntama ya mbeni ya Yandi, Satana. Yandi ke losa yandi na Dizanga ya Tiya, na bayina nionso vwandaka ya kutwadisama na Satana, samu na kumanga Ndinga ya Yandi ya mpulusu.

281 Yandi kele Ntinu ntangu yayi. Kyadi kele dyaka na zulu ya Kiti ya kimfumu. Beno losa ve munkayulu ya Yandi. Beno me mona? Minati-mpunda zaba kaka nani beno kele.

282 Mpe, ntangu yayi, mbeni ya Yandi, yina pesaka Yandi mpasi na bamvula mafunda zole, na kutubaka, “Mu lenda sala na bawu yina mu zola. Mu me kanga bawu kaka. Bawu kele ya munu. Mu . . . Bawu me zimbisa muswa kuna.”

283 Kasi Yandi kele Tata Mukudi. Yandi tubaka ti Yandi kele kuna samu na kusambidila ntangu yayi. Kasi kilumbu mosi . . .

Yandi tubaka, “Mu ke tula bawu na ntoni.”

284 Kasi Yandi tubaka na Dibuundu, “Mu ke basisa beno.” Beno me mona? “Kasi, ntete, mu fwana vwanda Musambidi.”

285 Ntangu yayi Yandi ke kwisa, ke katuka na Seko kuna, na Kiti ya kimfumu ya Tata, kisika Yandi me vwanda mutindu Musambidi. Ntangu yayi Yandi ke kwiza samu na kuvwanda Ntinu, oh, samu na kuyala bayinsi nyonso na nkawa ya kisengo. Lufundusu me belama na kubanda. Oh, mpangi, Tata Mukudi ya beto me simba yawu nionso. Ya kieleka. Yinga, tata.

286 Yinki Yandi ke sala? Yandi ke tula ntembe na mbeni, Satana. “Bawu kele ya munu ntangu yayi. Mu me vumbula bawu na ntoni.” Mpe Yandi ke baka bantu nyonso ya luvunu, mpe bantu

yina ke sobaka Ndinga, mpe bayina nionso, na Satana, mpe yandi ke bebisa bawu na Dizanga ya Tiya. Yandi me suka, ntangu yayi. Yandi ke losa bawu na Dizanga ya Tiya. Oh, la la!

²⁸⁷ Beno zaba yinki? Mu zola—mu zola kutuba kima awa ntete beto sukisa. Mpe na manima beto ke—beto ke—beto ke sala nswalu. Beno tala. Beto me kuma na nzila ya 7 ntangu yayi. Kasi kubanda na nzila ya 8, tii na nzila ya 14, mu zola ti beno bakula yina ke salama.

Nionso yina vwandaka *na zulu*, mpe nionso yina vwandaka *na ntoto* . . .

²⁸⁸ Beno kuwa yayi. Beno bika mu tanga yawu ntangu yayi. Mu ke kwikila ti ya ke vwanaka mbote kana mu tanga yawu na Buku, na nzila ya 7, beno me mona. Mpe beno tala mbote nzila ya 6.

Mpe mu—mpe mu ke mona, monaka, mpe, tala, na kati-kati ya kiti ya kimfumu mpe ya bibulu yiya, mpe na kati-kati ya bakuluntu, vwandaka ya kutelama Mwana-dimeme mutindu ya kufwa, ya vwandaka na bayintu sambwadi. . . to bibongo sambwadi (mu zola kutuba) mpe meso sambwadi, (beto me tendula yawu), yina kele Bampeve sambwadi ya Nzambi fidisaka na ntoto ya muvimba.

²⁸⁹ Beno me mona, bansungi sambwadi ya dibuundu, minatinsangu sambwadi yina vwandaka keba Tiya yina vwandaka pela. Beno me mona? Mbote mingi.

Mpe yandi kwisaka (Mwana-dimeme) mpe bakaka buku na diboko ya kibakala ya yandi yina vwandaka na kiti ya kimfumu—vwandaka na kiti ya kimfumu.

²⁹⁰ Ntangu yayi beno tala mbote. Mpe ntangu Yandi salaka yawu, beno tala mbote yina salamaka. Beno ke zonzila jubilé! Ntangu yayi ke kieleka kubukana ya Bidimbu yayi, ke salama. Beto ke kota na “minuti makumi tatu ya swi,” kaka na manima ya yayi. Beno tala mbote yayi, mpe beto ke banda. Beto ke sukisa na yayi, na nkokila ya Lumingu ke kwisa, kuna. Mpe beno kuwa mbote ntangu yayi. Beno me kubama? Beno tuba, “Amen.” [Dibuundu me tuba, “Amen.”—Mu.] Beno kuwa mbote, yinki salamaka ntangu Yandi salaka yayi.

²⁹¹ Ntangu luvangulu nionso vwandaka kunionga; muntu mosi ve zabaka yinki kusala, mpe Jean vwandaka dila. “Mwana-dimeme kwisaka, kuna!” Mpe Buku yayi vwandaka na maboko ya—ya Munkwa-kima ya kisina, samu ti muntu kubwaka mpe zimbisaka Yawu. Mpe muntu mosi ve vwandaka na kiyeka ya kubaka Yawu, diaka, samu na kuvulusa ntoto; nganga-Nzambi ve, pape mosi ve, kima mosi ve, mutindu mu tubaka. “Kasi Mwana-dimeme me kwiza!” Marie ve, santu yayi ve, to santu yina. “Mwana-dimeme kwisaka, na menga, ya kufwa, mpe bakaka Buku na diboko ya kibakala ya Yandi yina vwandaka na zulu ya Kiti ya kimfumu.” Mpe ntangu ba monaka ti ya

vwandaka na Mukudi; mpe myoyo nyonso na yisi ya autel, ntangu Bawanzio, ntangu bakuluntu, ntangu bima nyonso kumonaka yawu, ntangu yayi me salama. Yawu, ntangu yayi, kele dyaka samu na bilumbu ke kwisa. Na nkokila yayi Yandi kele Muvukisi, kasi Yandi ke na kwiza na yayi. Benoit tala mbote.

Mpe ntangu yandi bakaka buku, bibulu yiya mpe makumi zole ya bakuluntu fukamaka na ntwala ya Mwana-dimeme, bawu nyonso vwandaka na ba-harpe, mpe bambungu ya wolo ya kufulukuka na mananasi, yina kele bisambu ya basantu.

²⁹² Ya kele bayina kele na yisi ya autel, bayina vwandaka sambila, kubanda ntama. Benoit me mona, ba vwandaka sambila samu na mpulusu, ba vwandaka sambila samu na mvumbukulu. Mpe awa bakuluntu yayi—yayi ke na kumwangisa bisambu ya bawu na ntwala . . . Samu, ntangu yayi beto me kuzwa Mutalisi, beto kele na Tata na Mazulu, yina me kwisa samu na kulomba bamuswa ya Yandi.

Mpe bawu vwandaka yimba nkunga ya malu-malu, na kutubaka, Nge kele ya kulunga na kubaka buku, mpe kuzibula bidimbu kuna: samu ti nge kufwaka, mpe me vulusa beto na Nzambi ya beto (benoit tala mbote) na nzila ya menga ya nge na kati ya makanda nyonso, . . . bandinga, mpe bantu, mpe bayinsi;

Mpe nge me sala bawu bantinu mpe banganga-Nzambi samu na Nzambi ya beto: mpe beto ke yala na zulu ya ntoto.

²⁹³ Ba vwanza zola kuvutuka. Mpe awa ba ke vutuka, samu na kuvwanza bantinu mpe banganga-Nzambi.

²⁹⁴ Nkembo na Nzambi! Mu ke kuwa mbote mingi na kutuba na bandinga. Benoit tala. Benoit tala mbote. Yinga. Ya ke monana ti mu ke na ndinga ya kieleka ve; mu lendaka kumisa Yandi na yawu. Mu ke na nsatu ya mosi yina mu zaba ve.

²⁹⁵ Benoit tala, “Mpe mu vwanza tala . . .” Benoit kuwa yayi.

Mpe mu talaka, mpe mu kuwaka ndinga ya bawanzio mingi . . .

²⁹⁶ Benoit kuwa jubilé yayi! Ntangu ba monaka Mwana-dimeme yina kukwisa mpe kubaka Buku yina ya Mpulusu, mioyo vwanza boka. Beto ke zonzila yawu. Nyonso, bima nyonso, bakuluntu fukamaka. Bawu mwanzisaka bisambu ya basantu. Yinki? Ya vwanza na mosi yina vwanza talisa Tata samu na beto. Bawu kubwaka na nsi ya bizizi ya bawu. Mpe bawu vwanza yimba nkunga, mpe tubaka, “Nge kele ya kulunga, samu ti Nge kufwaka!” Benoit tala mbote yina . . . Mpe benoit tala Bawanzio yayi!

Mpe mu talaka, mpe . . .kuwaka ndinga ya bawanzio mingi pene-pene ya kiti ya kimfumu mpe bibulu mpe

bakuluntu: mpe lutangu ya bawu vwandaka mafunda kumi na makumi ya mafunda, . . . ya mafunda; (Fiou! Beno tala!)

Na kutubaka na ndinga ya ngolo, Ya kulunga kele Mwana-dimeme yina kufwaka samu na kuzwa ngolo, mpe bumvwama, mpe ndwenga, mpe ngolo, mpe lukumu, mpe nkembo, mpe balusakumunu.

297 Wapi mutindu ya jubilé ya kele kuna na Mazulu, ntangu Mwana-dimeme yina ke twadisa, ke bika kivinga yina kusambila, samu na kukwisa awa samu na kubaka bamuswa ya Yandi!

298 Beno zaba, yina simbaka mpe Jean. Yandi lendaka mona nkumbu ya yandi ya kusonika kuna. Ntangu Bidimbu yayi me bukana, yandi fwana vwanda na kiese ya kieleka. Beno kuwa yina yandi tubaka.

Mpe kivangu nionso yina kele na zulu, mpe na zulu ya ntoto, mpe na nsi ya ntoto, . . . mutindu . . . na kati ya mubu, mpe nionso yina . . . na kati ya bawu, kele na kati ya bawu, kuwaka munu, mu ke na kutuba, Balusakumunu, . . . lukumu, . . . nkembo, . . . ngolo, kuvwanda na yandi yina kele ya kuvwanda na kiti ya kimfumu, mpe na Mwana-dimeme ntangu nyonso . . . (Amen! Amen, mpe amen! Oh!)

Mpe bibulu yiya tubaka, Amen. Mpe makumi zole na yiya ya bakuluntu fukamaka mpe sambilaka yandi yina ke zingaka mvula na mvula.

299 Beno ke zonzila ntangu ya jubilé, beno ke zonzila ntangu ya nkembo, ntangu Mwana-dimeme yayi kwisaka! Beno me mona, Buku kele ya kukanga na Mazulu, mansweki kele.

300 Beno ke tuba, “Nkumbu ya munu kele kuna?” Mu zaba ve. Mu banza ti ya kele. Kasi, kana ya kele, ba tulaka yawu na Buku na ntuala ya mbandukulu ya yinza.

301 Kasi kima ya ntete, yina vwandaka talisa mpulusu yina, kwizaka Mwana-dimeme yina kufwaka kubanda mbandukulu ya yinza. Mpe Yandi bakaka Buku, (nkembo!) zibulaka Buku, mpe bukaka Bidimbu; mpe fidisaka Yawu na ntoto, na wanzio ya Yandi ya sambwadi, samu na kumonisa Yawu na bantu ya Yandi! Beno bawu yayi. Oh, la la! Yinki salamaka? Kuboka, makelele, ba-alleluia, bakupakulama, ngolo, nkembo, kumonisama!

302 Mpe kiboba ya Jean, yina vwandaka kuna, mpangi ya beto ya bakala, vwandaka dila! “Kasi,” yandi tubaka, “nionso na Zulu, nionso na ntoto, mpe nionso na kati ya mubu, kuwaka munu kuboka, ‘Amen! Amen! Balusakumunu, lukumu, mpe lenda, mpe ngolo, kuvwanda na Yandi yina ke zinga mvula na mvula.’”

303 Beno ke zonzila ntangu ya kiese, ntangu Bidimbu yayi me bukana! Jean talaka mpe monaka na simu ya rido ya ntangu, mpe tubaka, “Tala Jean.” Oh, oh!

304 Yandi vwandaka na kiese mingi, tii kuna yandi tubaka, “Nionso na Zulu.” Ya kieleka yandi bokaka, mutindu yina ve? “Nionso na Zulu, nionso na ntoto, nionso na nsi ya ntoto, bivangu nionso, nionso yankaka, kuwaka munu kutuba, ‘Amen! Balusakumunu, mpe nkembo, mpe ndwenga, mpe ngolo, mpe lenda, mpe bimvwama, kele ya Yandi.’” Amen!

305 Samu na yinki? Ntangu luzayikisu kwisaka, ti Mwana-dimeme, Mukudi, Tata ya beto, me vutuka na Kiti ya kimfumu ya muvukisi mpe kwisaka awa samu na kubaka kima ya Yandi.

Ntama ve Mwana-dimeme ke baka Kento ya
Yandi ya makwela samu na kuvwanda na
Iweka ya Yandi,
Makesa nionso ya Mazulu ke vukana;
O, ya ke vwanda na ntalulu ya nkembo,
basantu nyonso me lwata bilele ya mpembe;
Mpe na Yesu beto ke yala Kukonda nsuka.
Oh, “Beno kwisa kudia,” Mulongi ke bokila,
(Na Ndinga!) “Beno kwisa kudia.”

306 Oh, mu—mu—mu ke kondwa bampova, beno me mona.

“Beno kwisa kudia, beno kwisa kudia,”
Beno lenda sala feti na mesa ya Yesu ntangu
nionso, (Ntangu yayi! Kasi ntangu Yandi ke
katuka, kivuvu ke vwanda dyaka ve.)
Yandi Yina disaka nkonga ya bantu, me soba
masa na vinu,

307 Yandi yina tubaka, ti, “Yandi yina ke kwikila na Munu, yandi mpe ke sala bisalu yina Mu ke sala.” Oh, la la! Yandi yina silaka bima yayi na bilumbu ya nsuka. Yandi yina tubaka bima yayi. Yandi yina kele ntangu yayi na ntangu ya luzayikisu ya bima yayi yina ke zabana. “Beno kwisa kudia.” Oh, beno kondwa Yawu ve, mpangi ya munu ya bakala.

Ntangu yayi beto kulumusa bayintu ya beto na mwa ntangu fioti.

308 Mbasi na nkokila, na lemvo ya Nzambi, beto ke meka na kubuka Kidimbu yina ya Ntete, kana Nzambi ke buka Yawu samu na beto mpe ke bika beto kumona yinki luzayikisu yayi vwandaka, “yina ba bumbaka kubanda na mbandukulu ya yinza.”

309 Ntete beto sala yawu, nkundi ya nsumuki, to mambele ya dibuundu yina kele tiya ve madidi ve, beno kele kaka na kalati ya mambele ya dibuundu, to beno kele ve na kalati ya mambele? Mpe kana beno kele kaka na kalati ya mambele, beno ke sala mbote na kuvwanda na yawu ve. Beno ke na nsatu ya Mbutukulu.

Beno fwana kwisa na Menga. Beno fwana kwisa na kima yina ke vwanza disumu kimakulu, ti ya ke vwanda dyaka na lubambuku ya yawu.

³¹⁰ Kana beno me kubama ntete ve, samu na kukutana na Mwana-dimeme na mipepe! Mpe na nzila ya ngolo yina mu me kuzwa na nzila ya lutumu ya munu, yina Nzambi ya Ngolo nyonso me pesa munu, mpe yina me ndimisama na munu na nzila ya Wanzio, Dikunzi ya Nsemo, mu ke tuma beno, na Nkumbu ya Yesu Klisto! Beno meka ve kukutana na Yandi kaka na kalati ya mambele ya club ya dibuundu ya ntoto yayi.

³¹¹ Beno kwisa, na yina Muvukisi, mutindu mu me zaba, kele kaka na zulu ya Kiti ya kimfumu, ke na kusambila. Samu, ya ke vwanda na kilumbu yina beno ke zola kukwisa, mpe ya ke vwanda ve na Muvukisi. Samu ti kana beto tala ngunga yina beto ke na kuzinga, na nsungi ya dibuundu ya sambwadi, mpe mansweki ya Nzambi kele yina ya kele, na Mpeve ya Nzambi yina me siamisama na kuzabaka nionso yina Yandi silaka na bilumbu ya nsuka, bantangu yikwa me bikana? Nkundi ya munu ya nsumuki, kwisa.

³¹² Mfumu Yesu, bangunga me kuma na nsuka. Ntangu yankaka ya me luta mingi ti beto ke banza yawu. Mpe beto ke na kiesa na kumona ngunga yayi ke na kubelama. Ya kele ngunga ya kulutila nkembo yina yinza me zabaka ntete ve, samu na mukwikidi. Kasi, samu na yina ke manga, ya kele ntangu ya kulutila mpasi yina me vwandaka ntete ve. Ya lendaka vwanda ve na bampova na kati ya alphabet, bisono samu na kusala bampova, yina lendaka talisa mpasi mpe mawa yina kele na ntwala. Mpe ya kele ve na bampova yina ba lendaka sala, na alphabet ya beto, samu na kutalisa balusakumunu yina kele na ntwala samu na mukwikidi.

³¹³ Tata, ya lendaka vwanda na bayankaka, na nkokila yayi, awa kukondwa kivuvu. Mpe ba kele bantu ya mayele. Mpe ntangu yayi kana Menga kele dyaka na Kiti ya Kyadi, bika ti Mwana-dimeme kutelama na Kiti ya kimfumu, samu na kukwisa na ntima ya bawu, na nkokila yayi, mpe kumonikisa na bawu ti bawu kele ya kuzimbana. Mpe na maboko ya Menga, na kutubaka, “Beno kwisa, ntangu ya kele ntangu ya kukwisa.”

³¹⁴ Mu ke pesa Nsangu, Mfumu, na kisambu ya munu, na maboko ya Nge. Sala nionso yina Nge zola, Tata, na Nkumbu ya Yesu.

Na bayintu ya beto ya kukulumusa.

³¹⁵ Kana beno me zitisa ve lombilu yayi mpe musiku yayi! Kana beno me tula kivuvu na dibuundu ya beno! Ya vwandaka ve na kima yina lendaka vulusa. Kana beno tulaka kivuvu na kisambu ya mwa santu mosi, beno kele kaka ya kuzimbana. Kana beno me tulaka kivuvu na bisalu ya maboko ya beno, kima yina beno me salaka, bisalu ya mbote, beno kele ya kuzimbana. Kana beno

me tula kivuvu na—na kisambu ya mama ya beno, to mambote ya mama ya beno, tata ya beno; kana beno tulaka kivuvu na yawu, beno kele ya kuzimbana. Kana beno tulaka kivuvu na sensation mosi, mwa nsatu mosi ya ngitukulu, mwa émotion, kuzonza na bandinga, to kubina! Kana yawu yina nionso beno me tula kivuvu ya beno, mpe beno me zaba ve Mwana-dimeme, na mutindu nionso, beno me zaba Yandi ve, na yina, mu ke tuma beno na ntwala ya Nzambi, beno sungika kima yina na ntangu yayi, na Nzambi.

³¹⁶ Kuna na kati ya ntima ya beno, beno sambila. Mpe beno vwanda kaka ya kukikulumusya, samu ti Nzambi me bumbama na kati ya kukikulumusya. Beno ke bambuka moyo, Biblia ke tuba, “Ba bwelaka bayina nionso kwikilaka.”

³¹⁷ Mpe na yina beto ke sambila samu na beno, mu ke tula kivuvu ti beno ke baka lukanu (ya beno) ya Kukonda nsuka, “Mfumu, mu ke tuba, ‘Yinga!’” Mpe *lukanu* kele “ditadi.” Kasi wapi mbote ditadi ke sala kukondwa maçon yina lenda zenga yawu, samu na kupampa yawu samu na lutungu, kuyidika yawu samu na lutungu? Na yina, bika ti Mpeve-Santu kuzenga beno na yina beno kele, samu na yina beno fwana vwanda. Kana beno kele kaka mambele ya dibuundu ya ngaanda; kana beno kele nsumuki; nionso yina beno kele; kana beno kele kukondwa Klisto, kukondwa Mpeve-Santu, Nzambi kupesa beno ngemba, na nkokila yayi.

³¹⁸ Ntangu yayi, Mfumu, na mutindu ya kuvedila mu zaba, mpe landila mutindu—mutindu ya kulutila mbote na Masonuku ti mu me zaba na kukwiza, Mu ke kwisa ntangu yayi na bayina mu me pesa na Nge, na Ndinga. Mu ke tula kivuvu, Mfumu, ti Ndinga me kuzwa kisika ya Yawu na kati ya ntima ya bantu, na nkokila yayi.

³¹⁹ Kana ya kele awa na bayina zaba ve, to yina kele ve na kivuvu ya Mvwandulu ya Mpeve-Santu ya lembami na luzingu ya bawu; ti, bakudasuka, to kukondwa kukipe, to munimi, to kima mosi me katula bawu na Kima yayi ya nene, mpe me pekisa bawu na kuzwa Yawu; to credo mosi, to—to sensation mosi, me pekisa bawu na lembami ya kubundana na Nzambi; beno kuzwa luvukulu na ntangu yayi!

³²⁰ Mpe ti Mwana-dimeme yayi, Tata yayi ya santu, ya kufulukana na Menga, yina me kwisa na Kiti ya kimfumu, yina me luta na kati ya Bansemo ya mansweki ya ba-couloir ya Kiti ya kimfumu ya Nzambi, yina me belama samu na kulomba difwa ya Yandi! Nzambi, pesa, na nkokila yayi, ti bawu ke ndima Yandi. Bika ti lukanu nionso kubakama na luzitu nionso, mpe bika ti bawu kukipesa bawu mosi na Yandi Yina kaka lenda zenga bawu mpe kuyidika bawu na bana ya babakala mpe bana ya bakento ya Nzambi.

321 Ntangu yayi, na kisambu ya luzitu, mu ke sala yayi na mutindu mu me twadisama na kusala yawu. Na luzitu, na ntwala ya Nzambi, mutindu Yandi me kukitalisa Yandi mosi na beno. Mpe beno vwandaka Muklisto ve, to beno vwandaka ve yina beto ke bokilaka . . . Muntu ya denomination ve—ve, kasi mu zola tuba Muklisto yina me butuka mbala ya zole. Kasi beno me kwikila na luzitu ti Nsangu kele kieleka, mpe beno me kwikila na luzitu ti beno lenda kuzwa mpulusu kaka na nzila ya lemvo ya Nzambi. Mpe beno ke kwikila ti Yandi ke tuba na ntima ya beno ntangu yayi. Mpe beno zola ndima Yandi, mpe beno me kubama samu na Ndinga ya Yandi na ku—kuzenga beno na yina beno kele, mpe kusala beno yina beno fwana vwanda. Beno ke pesa kimbangi mutindu mosi, na kutelemisaka maboko ya beno? Kana muntu yina kele awa, mpe yandi zola sala yina kele ya kul- . . . yina kele nionso ya kulunga, beno telema.

322 Tata ya Mazulu, mu zaba diaka ve yinki kusala kasi kutanga Ndinga ya Nge. Tala babakala me telama, yina ke kuwa ti ba me vwandaka ve yina ba zolaka vwanda, ba me kubama samu na Enlevement yayi, samu ya lenda salama na ntwala Kidimbu ya Ntete kuzibuka na beto.

323 Mpe, Tata, mu ke sambila samu na bawu. Mu—mu, mutindu kisadi ya Nge, mu ke pesa kisambu yayi na Musambidi ya nene, Klisto. Na yina bawu ke sambila, mu ke pesa kisambu ya munu samu na bawu, na zulu ya Kiti ya kimfumu ya Nzambi, kisika Munkayulu ya Menga kele ya kuvwanda kuna na nkokila yayi. Mpe na konso ntangu yina Yandi lendaka katuka na Kiti ya kimfumu, samu na kukwisa kulomba kima ya Yandi, na yina ya ke vwanda dyaka ve na kyadi; ya kele lufundusu.

324 Pesa, Mfumu, ti bantu yayi me telama, bayina kele ya kutelama; na kati ya bantima ya bawu, ke na kusalaka funguna ya bawu, mpe ke zola kubika Mpeve ya Nzambi kuyidika bawu, mpe kuzenga bawu, mpe kutula bawu na kati ya matadi ya moyo, na kati ya Yinzo ya Mfumu Nzambi. Pesa yawu, Tata. Mu ke pesa bawu na Nge ntangu yayi.

325 Mpe Nge tubaka, “Yandi yina ke ndima Munu na ntwala ya bantu, Mu ke ndima yandi na ntwala ya Tata ya Munu mpe Bawanzio ya santu.” Mpe ntangu yayi Nge kele kuna, na ntwala ya bantu nionso, na nkokila yayi. Mpe bawu me telema, ba ke funguna Nge. Mpe, Mfumu, kana ba ke sala yawu na kati ya ntima ya bawu, mutindu Ndinga ya Nzambi kele ya kieleka, Nge ke na kusambila samu na bawu na ntangu yayi, mpe na kundimaka bawu na bisika ya lemvo mpe mawa ya Menga yina ke vedisa ya Mwana—dimeme ya munkayulu. Mpe ba ke vwanda ya Nge, na Nkumbu ya Yesu Klisto. Amen.

326 Ntangu yayi, beno yina ke mona bantu yayi me telama, bakala yayi ya ntwenia yina kele *kuna*, mpe bayina kele ya kutelama, beno bayina me kuwa ti disumu nionso mpe lufundusu

me zimbana. Mu zola ti beno telama, beno yina kele pene-pene ya bawu. Beno pesa bawu mbote, mpe beno tuba, “Mpangi-bakala, mu ke sambila samu na nge. Mpangi-kento, mu ke sambila samu na nge.” Beno pesa kaka bawu mbote, mpe beno tuba, “Nzambi sakumuna nge.” Mpe ntangu yayi nionso kele na diboko ya Ngolo nyonso. Beno tuba, “Mu ke sambila, mpe mu ke sala nionso mu lenda sala samu na kusadisa beno na Kimfumu ya Nzambi.”


. . . oh, ke bokila bubu yayi,
Oh, Yesu ke na kubokila, Yandi ke na kubokila
na mawete bubu yayi.

³²⁷ Beno zola Yandi? Yandi kele mbote ve? Oh, yinki beto ke sala kukondwa Yayi? “Muntu ke zinga kaka na dimpa ve; kasi na konso Ndinga yina ke basika na yinwa ya Nzambi, muntu ke zinga.” Oh, disa munu, Mfumu, na Ndinga.

³²⁸ “Beno bika ve kimvuka ya beno, mutindu ya kele kikalulu samu na bantu ya kukondwa lukwikilu, mpe yina kulutila beno ke mona Kilumbu ke belama.”

³²⁹ Kana Nzambi zola, mbasi na nkokila, na lemvo ya Nzambi, mu ke meka, na nionso yina kele na kati ya munu, samu na kulomba Yandi na kusa-. . . kusambidila, ti mansweki ya Bidimbu yayi, mutindu ya Bidimbu, na yina ya ke zibuka, kusamuna Ndinga ya Nzambi na bantu.

Tii kuna mu ke kutana na beno, Nzambi kuvwanda na beno!

³³⁰ Mpe ntangu yayi mu ke vutula kisalu na mpangi ya beto ya bakala, Mpangi Neville, pasteur. Bantu yikwa ke zolaka Mpangi Neville? [Dibuundu me tuba, “Amen.”—Mu.] Ntangu yayi, beto nionso. Kwisa, Mpangi Neville. Mpangi Neville, Nzambi sakumuna nge, mpangi-bakala. 

MPWASIKA KATI-KATI YA BANSUNGI SAMBWADI
YA DIBUUNDU MPE BIDIMBU SAMBWADI KNG63-0317E
(The Breach Between The Seven Church Ages And The Seven Seals)

BANDANDANI YA LUZAYIKISU YA BIDIMBU SAMBWADI

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 17 ya Ngonda ya tatu, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org